

Wantok

Gutpela Belo Kaikai



Namba 1903 Wan Wik Februeri 10 - 16, 2011

Niuspepa Bilong Yumi Ol PNG Stret!

K1 tasol

INSAIT-

Nu Silan Waitangi
de long PNG...

Pes 10 na 11

Bek tu skul
2 pes spesol
insait..

Pes 14 na 15

BISNIS-

Kutubu meri
lonsim rais masin...

Pes 21

Givim bikpela mekimsave long spakman

GAVMAN i mas kamapim lo bilong
givim mekimsave long ol manmeri
husat i spak na mekim trabel.

Paul Zuvani i raitim

Na dispela em long husat manmeri i spak
long dring bia o simukim spak brus.

Wankain mekimsave i mas go long husat
manmeri i mekim bia na salim ausait long loa o
i salim spak brus.

Reg Monagi, mausman bilong SP Brewery,
kampani we i save mekim SP bia, i mekim dispela
tok long dispela wik long taim gavman i tok
long kamapim kibung we bai toktok long mekim
bilong bia, spak na spak brus.

Gavman i askim long kamap bilong dispela ki-
bung na kibung bai kamap long Mosbi long 14 i
go 16 Februari long narapela wik.

Mista Monagi i tok ol loa bilong kantri long
mekimsave long manmeri i mekim na salim bia
ausait long loa na spak na bagarapim samting i
daunbilo tumas.

Dispela i mekim planti manmeri i ronawe na
go het long mekim pasin nogut.

Em i tok long ol arapela kantri olsem long
Solomon ailans, sas bilong spak na bagarapim
samting i stap olsem K2,000, long PNG em i
K200.

I go moa long pes 3



Poto: Nicky Bernard

FULL TAIM WOK: Noah Samson, em man bilong salim
balun na ol samting long rot. Lukim moa stori long pes 18.
Poto Nicky Bernard

Balun man...

FRI bihain long 2pela SMS

Salim
tupela sms.
kisim 18
Fri sms



Kisim 20 teks
long prais lo tupela
teks tasol!

Sapos yu salim
tupela teks namel
long 7am monin
na 9:59pm nait bai
yu kisim 18 teks fri
behain long em.

Digicel

Bikpela. Stronpela moa Network bilong PNG.

Digicel Tems na Kondisen bai stap.



NUPELA YELO FIN TUNA

TRAIM WANPELA TUDE!

Stap nau
long stua
klostu
long yu

wantaim lombo na soya bin wel



Namba wan kaikai bilong PNG ...

MRDC bung long daunim hevi bilong spak

Paul Zuvani i raitim

MINEREL Risoses Developmen Kampani (MRDC) Ltd long dispela wik i givim K20,000 long Loa na Jastis Sekta Sekretariat long helpim long holim 2011 ki-bung long toktok bilong "bia na hevi bilong spak long PNG."

Bung bai kamap long Mosbi long 14 i go long 16 Februari long nara-pela wik.

MRDC Ekstenel Afeas Menesa, Imbi Tagune, i makim kampani na givim mani long Sekretariat.

Long taim bilong givim mani,

kampani i save olsem kain hevi i bikpela long kantri.

Em i ken givim hevi bilong famili i brukdaun, kros pait long famili na komyuniti, bagarapim samting long komyuniti na manmeri i ken dai long pait o bam na dai sapos ol i draiv.

Pasin bilong dring na spak i givim bikpela hevi long loa na oda.

Dispela hevi i kamap bikpela tu long wanem ol atoriti i nogat inap luksave long daunim kamap bilong em.

Sapos gavman i no mekim wan-pela samting dispela inap bagara-

pim ikonomi na sosel laip bilong manmeri long kantri.

"Long taim ol bikpela projek i kamap bilong strongim ikonomi, mipela i no laik long lukim ol hevi i pasim kamap bilong dispela ol projek.

"Mani mipela i givim long tude (Februari 8) bai helpim tingting bilong Loa na Jastis Sekta Sekretariat long daunim ol hevi em spak pasin i kamapim.

"MRDC i save tu olsem mak bilong bia ol manmeri i kisim long dispela taim i wok long go antap na sapot mipela i givim long Sekretariat

bai go longwe long daunim dispela hevi.

"Olsem kampani i go pas long lukautim ikiti na royalti mani bilong ol papagraun long we wok maining na petroleum projek i kamap, MRDC i salim strongpela tok i go olsem em i gat bikpela tingting long sapotim wok bilong daunim hevi bilong spak na ol hevi i pas wantaim dispela pasin.

"Oltaim mipela i toksave long ol papagraun olsem wok bilong maining na petroleum i kamap long laspela hap bilong ol long stap na em i gutpela ol i mas kamapim sampela

samting long strongim ol yet taim dispela ol projek i pinis.

"MRDC i laik lukim tu olsem PNG Loa na Jastis Sekta i poroman wantaim projek developa long kantri long bringim toktok bilong hevi bilong spak na kisim ol spak brus na ol arapela samting we i save paulim tingting bilong manmeri.

"Mipela i tok amamas long planti ol bikpela maining na petroleum projek developa long ol i gat strongpela tambu tok long ol manmeri i no ken spak long hap bilong ol.

"Dispela em i gutpela loa," Tagune i tok.

IFC glasim invesmen bilong en wantaim PNG Maikrofainens ...em gat invesmen tu wantaim BSP, Digicel (PNG) na KK Kingston

James Kila i raitim

EKSEKUTIV Vais Presiden bilong Intanesenel Fainens Koporesen (IFC) na Sif Eksekutiv Ofisa, Lars Thunnel i bin mekim wanpela lukluk raun i go long PNG Maikrofainens Limited ofis long Koki long bungim ol wokman meri na ol narapela lain husat i save kisim helpim na tu kisim stori long wok operesin.

IFC em wanpela memba bilong Wol Benk Grup na em bikpela developmen institusen we i save lukluk long helpim praivet sekta long ol di-

veloping kantri. Em i save kamapim sampela rot long lusim hevi bilong nogat mani samting (poverty) na bringim kamap gutpela sindaun.

IFC i putim mani o investim olsem K1.4 milien long PNG Maikrofainens Limited, na nau i gat 19-pesen sea olsem papa insait long dispela kampani. IFC i save givim edvais na menesmen sapot i go long PNG Maikrofainens Limited long givim ol liklik bisnis manmeri long kisim fainensal helpim long wok bilong ol.

PNG Maikrofainens Limited i save wok long

sait bilong kredit na fainensal sevises na tu sevises sapot i go long ol maikro na smol bisnis. Em i bin statim wok bilong en long PNG long 2004 olsem namba komesal maikrofainens institusen.

Em i helpim tu dispela ogenaesisin long stretim operesin bilong en long sait bilong bisnis plening na trening long sait bilong ol kredit polisi. IFC i helpim tu long bringim kamap gut ol helpim i go long ol kastoma o klaiens bilong en. Em i helpim tu long developim ol kain kain rot long kisim dinau o lon we ol lain borowa o lain

bilong kisim dinau i laikim long en.

Long sait bilong daunim ol edministresin kos, bringim moa reveniu o mani na daunim ol hevi long sait long givim dinau, IFC i bin helpim PNG Maikro Fainens Limited long kamapim bikpela fainensal sasteinabiliti o wok go het bilong en. Rekot bilong PNG Maikrofainens nau i soim olsem em i gat 2,507 ektiv lain husat i kisim dinau na 63,677 lain i putim mani olsem diposit wantaim benk na dispela ol ektiv diposit em veliu bilong en em 13.61 milien dola stat long Jun 30, 2010.

Insait long las 5-pela yia IFC i bringim kamap moa luksave bilong en insait long PNG na risos wok we IFC i givim mani helpim stret long ol longpela tem developmen patna olsem Australia, Japan na Nu Silan.

Mani helpim IFC i givim long PNG Maikrofainens i gro stat long K1.2 milien long 2005 i go moa long K200 milien long Jun 30, 2010. IFC i gat sea tu long kampani olsem Benk Saut Pasifik (BSP), Digicel PNG na KK Kingston.

IFC i save kamapim rot long ol pipel i no ken stap long nogat mani samting na ol pipel i mas kamapim gut sindaun bilong ol. IFC save givim fainens long helpim ol bisnis long kisim moa pipel long wok na givim sevis, bungim mani wantaim na givim edvais na menesmen edvais long sait long birua i kamap na

tu lukim olsem ol wok developmen i go het na kamap gut.

Long taim wol i bin bungim hevi long sait bilong ikonomi na mani

hevi, nupela invesmen bilong IFC i surik i go antap long mak olsem K18 bilion insait long 2010 fainensal yia.



EKTING Sif Eksekutiv ofisa bilong PNG Maikrofainens, Tobias Thomas i bringim Eksekutiv Vais Presiden bilong Intanesenel Fainens Koporesen (IFC) na Sif Eksekutiv Ofisa, Lars Thunnel (raithan) I go long ofis bilong ol long Koki. *Poto: Nicky Bernard*



EKTING Sif Eksekutiv ofisa bilong PNG Maikrofainens, Tobias Thomas i soim pepa wok long Eksekutiv Vais Presiden bilong Intanesenel Fainens Koporesen (IFC) na Sif Eksekutiv Ofisa, Lars Thunnel. *Poto: Nicky Bernard*

OXFORD, TOK PISIN INGLIS DIKSENERI

Katim, na pulimkamim oda fom daunblo na salim i kam long Wantok Niuspepa sapos yu laik balm dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim: Dispela Luk i ken helpim yu lanim Tok Pisin i go long Inglis, o Inglis i go long Tok Pisin. Harap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

FILE	ISBN	PRICE	QTY	TOTAL
PNL Tok Pisin English Dictionary	9780195551129	K32.00		

Please send me a copy of the book.
 I am interested in your products.
 I would like to see your products.

Name: _____
 Address: _____
 City: _____
 State: _____
 Zip: _____
 Phone: _____
 E-mail: _____

FAX BACK TO: (675) 325 2579
 Please fill in the following:
 Name: _____
 E-mail: _____
 Street: _____

Yasause kamap long kot

DOKTA Theo Yasause i kamap long kot long Tunde dispela wik bihainim dai bilong bipo Kumul pilaia, Akuila Emil.

Em i stap yet long han bilong polis na i gat tok olsem liklik taim polis bai kisim em i go long Bomana haus kalabus.

Em bai stap long Bomana na wetim kot bilong em. Bikos, ol tok i kamap olsem em i kilim man, Komitel Kot bai i no inap harim tok bilong em long mekim beil.

Long taim Mejjistret Rosie Johnson i ritim ol sut toktok long kot haus, em i no kisim wanpela loya long makim em.

Ol prosekyuta i wok long redim fail long asua, sapos em i mekim, na taim dispela i redi i bai askim em long sanap gen bipo long ai bilong kot na bekim ol sas.

I gat tok olsem Yasause, 43, bilong Bukinera ples, Wes Yangoru, Is Sepik Provins i sutim Emil long las Fraide moning ausait long Lamana nait klab, Waigani.

Tasol pastaim long dispela em i tok em i bin stap wantaim faiv o 6-pela arapela man long taim dispela hevi i kamap.

Dokta Yasause bipo i hetman bilong Opis bilong Klaimet Senis tasol inap long nau i stap wantaim Opis bilong Praim Minista long taim dispela hevi i kamap.



ASUA: Dokta Yasause

Wanpela papa kaikaim bebi

998 moa Madang papagraun no laikim DSTP

I GAT 998 moa papagraun long Madang, i go insait long kot agensim Ramu Nikel main developa MCC, na gavman.

Man husat i go pas long kot agensim kampani, Louis Mediang, husat em yet i makim 73 papagraun bilong ples Basamuk, na 9-pela arapela plentif o man i kirapim kot, i wanbel tasol long ol arapela 998 papagraun i laik bung wantaim em long kot bilong pasim kampani bai em i noken tromoi pipia bilong

wok maining bilong en i go insait long solwara bilong Madang.

Jas i harim dispela kot, Jastis David Cannings, i bin mekim disisen aste (Trinde), long tok orait long dispela 998 arapela papagraun i go insait long kot bilong Mediang.

Dispela kot bilong harim olgeta evidens bilong ol papagraun, na kampani, em i kirap long Mande dispela wik tasol.

Sapos evidens bilong

Mediang na ol wan plentif bilong em i gat inap strong, ol i ken pasim kampani long noken tromoi pipia long solwara, na bai ol i mas painim wanpela hap long graun bilong tromoi.

Long taim projek yet i bin kirap, kampani, wantaim gavman na dipatmen bilong envaironmen na konsavesen i wok strong olsem dispela rot em i wanpela rot tasol i stap bilong ol long tromoi pipia bilong wok ol i mekim.

Givim bikpela mekimsave long ol spakman...

I kam long pes 1

"Sas bilong K200 i liklik tumas.

"Ol manmeri i no inap long wari long dispela kain sas long wanem ol i ken painim dispela mani isi na go het long mekim pasin nogut bilong ol.

"Taim gavman i kamapim strongpela lo dispela inap daunim sampela hevi," Monagi i tok.

Kibung bai lukim ol mausman bilong gavman, Loa na Jastis Sekretariat na ol sponsa olsem SP Brewer, ExxonMobil, Minerel Risoses Developmen Kampani, Britis Amerika Tobako (BAT) na sampela moa.

Bihainim dispela kibung gavman i tingting long kamapim wanpela bodi we bai stap na karimaut ol tingting na plen bilong daunim dispela hevi.

Pasin bilong spak i ken kamapim hevi olsem:

- DAI, manmeri i draivim ka na bam o kros pait,
- BAGARAPIM samting bilong famili o pablik;
- HANGRE bikos famili nogat mani long baim kaikai;
- FAMILI bruk, meri/pikinini no inap stap gut;
- KAMAPIM namba bilong HIV/AIDS bikos manmeri no save samting ol bai mekim o i mekim;
- SIK, manmeri i ken go long-long.

...CBC Sekreteri agensim tru dispela

Veronica Hatutasi i raitim

PASIN we wanpela man i kaikaim narapela em i nogut tru na em i samting we pipel i stap laip long dispela taim i agensim tru, Jenerel Sekreteri bilong Konpres bilong ol Katolik Bisop long PNG na Solomon Ailan (CBC), Pater Victor Roche, i tok.

Tru, Pater Victor i no ritim nius long dispela samting, tasol taim Wantok ripota i tok tok long ripot bilong dispela samting long em, em i egenim stret kain pasin we dispela kantri i harim na lukim long namba wan taim.

"Mi egenim stret dispela pasin we ol man i gat tingting i no inap mekim long wanpela man in kaikaim narapela. Na dispela kain pasin em i samting we pipel i stap long dispela 21st senseri i agensim tru," Pater Victor i tok.

Pablik long dispela kantri i kirap nogut na agensim pasin nogut tru i kamap we wanpela man i kaikaim narapela.

Long las wik Fraide, nius i bin kamap long wanpela man long Tabubil i kaikaim liklik bebi na pikinini bilong em i gat wanpela wik tasol.

Ol pipel i stap long maning taun bilong Tabubil i stap

wantaim pret na planti holim ol pikinini bilong ol long haus. Nau tu, ol i was gut long ol liklik pikinini bilong ol i no raun ausait.

Long ol tok klia ripot i kam long ol Tabubil polis, man i kaikaim bebi i bilong Tari long Sauten Hailans provins husat i maritim wanpela meri bilong Sandaun provins na ol i stap long Wangpin setelmen long Tabubil.

Ol ripot i tok dispela samting i bin kamap long las wik Fonde nait long 10 kilok samting taim man i go kamap long haus na paitim nogut meri bilong em. Bihain em i pulim liklik bebi na brukim nek bilong em na stat long kaikaim em.

Ol neiba i bin harim kraib long bebi na singaut bilong mama na ol i lukim dispela samting nogut i kamap na putim ripot i go long ol Tabubil polis husat i go na kisim taim stret long stopim man long kaikaim bebi.

Ol ripot i tok ol neiba i papaitim man ya wantaim hama, ol palang na ol stik tasol ol i no bin inap long stopim em inap ol polis i kam. Ol polis tu i bin kisim taim long stopim em.

Ol ripot i tok dispela bebi i no pikinini stret bilong tupela marit, tasol ol i kisim long lain bilong meri bilong em na lukautim.

Ol ripot i tok tu olsem man ya i mas memba bilong wanpela kalt. Long nau, em i stap long han bilong ol polis we i karimaut ol wok painim na larim lo i mekim wok bilong em long givim mekim save i go long em.

Hela sif askim manmeri long go bek long ples

HETMAN bilong ol sif long Hiwa-Tuguba traib long nupela Hela provins, Stanis Talu, i askim ol Hela manmeri long go bek na developim ples.

Tasol i tok sampela bilong ol i no ken stap long Mosbi tasol bikos long giaman bilong gavman, ol i kam na inap long 12-pela mun 12 man i dai pinis.

Em i tok ol i dai long taim ol i wetim long kisim MoA, sid kapitel na ministerial komitmen we William Duma, Arthur Somare, Anderson Agiru, James Marape na Francis Potape i tok promis long givim long kamap bilong PNG Lukwifaid Nuturel Ges (LNG) projek.

Em i tok, kos bilong salim wanpela dai bodi i go nek long ples i bikpela tumas..

I no longtaim wanpela yangpela lidaman long wanpela graun, Mark Haralu, husat i dai we famili na klen bai haiarim balus long K45,000 na kisim bodi i go bek long ples long Tuguba.

Haus kraib i stap long Rainbow Viles, Gerehu. Long taim ol putim mani long salim bodi i go, ol Hela lidaman Olsem Memba bilong Komo Margarima Memba, John Kekeno, bipo Sauten Hailans primia Albert Mokai, Komo LLG deputi presiden Peter Purani, Philip Undialu na Thomas Gamu i bin stap.

Purani i tok em i bilong Tuguba-Tabu na man i dai bilong wod kaunsil bilong em na olsem em bai salim bodi i go.

"Long 2 kilok moning lond Disemba 8, 2009, mipela i sainim LBBSA long Nagoli long Hides na gavman i satarim balus na kisim mipela i kam daun long Mosbi.

"Mipela i stap wetim yet dispela bisnis developmen gren we gavman i promis long givim mipela.

"Mipela i no kisim yet dispela mani na long taim mipela i wok long wet, sampela bilong mipela i kisim HIV/AIDS, planti i stap wantaim hangre na sampela moa i nogat gutpela hap ples bilong stap.

"Mipela i no kam long laik bilong mipela, tasol bikos long askim bilong ol arapela lain, laip bilong mipela i bagarap nating," Purani i tok.

Em i tok bilong wanem gavman i kisim ol i kam na i lusim ol i stap nating long kisim bagarap?

Em i askim gavman long satarim balus long kisim ol i go bek long ples.

Em i tok inap long gutpela luksave bihainim tok promis bilong gavman i kamap, nogat wanpela LNG wok bai mas kamap long ples bilong ol.

Nestle MILO

KAMAPIM CHAMPION BLO YU!

THE ENERGY FOOD/DRINK

Nestle MILO Actigen-E

200g NET

Petromin amamas long Interoil na ol developmen patna long LNG agrimen

James Kila i raitim

NESENEL oil, ges na mineral kampani, Petromin PNG Holdings Limited, i tok amamas long InterOil Koporesin na ol patna bilong en, Energy World Corporation (EWC) na Liquid Niugini Gas Limited (NLGL) long go insait long Definitiv Agrimen long developim namba tu LNG projek long PNG.

Menesing Dairekta bilong Petromin, Joshua Kalinoe, i tok olsem kampani Stet i makim long projek, Petromin i amamas long wok bung long projek taim Fainal Investmen Disisen (FID) i kamap.

Mista Kalinoe i tok Petromin i amamas long tokaut bilong ol dispela lain investa na bai i wok klostu wantaim Ges ofis long stretim rot long Stet i go insait long dispela projek long taim bilong FID.

Galf provins bai lukim bikpela likwifait netserel ges (LNG) projek i go het gut bihain long tupela bikpela kampani i sainim wanpela bikpela agrimen long wok bung long developim na kamapim likwifait netserel ges (LNG) projek insait long provins.

Ol i sainim dispela agrimen fran long Praim Minista Se Michael Somare long Mosbi.

Pacific LNG Operesens Limited i tokaut long aste olsem join vensa LNG projek kampani bilong en wantaim InterOil i sainim agrimen bilong putim mani long projek fanding na konstraksin agrimen (PFCA) na wanpela seaholda agrimen wantaim Energy World Corporation Ltd (EWC) long wokim wanpela 3-milien tan LNG fektori long lokal eria long Galp provins bilong PNG.

Dispela agrimen bai i lukim EWC i putim mani long kamapim narapela bikpela LNG projek long PNG we bai salim ges i go long intanesenel maket long wol.

Insait long dispela agrimen ol LNG bilong tupela bikpela projek em Elk na Antelope LNG projek long Galp bai kirapim wok insait long 30-pela mun taim olgeta agrimen wantaim ol papagraun, provinsal gavman na nesanel gavman i kamap orait.

Ol bikman bilong InterOil na EWC na Pacific LNG Operations Ltd i bin sainim agrimen wantaim tu Gavana bilong Galp provins, Haivila Kavo fran long ol gavman minista olsem Minista bilong Maining na Petroleum, William Duma, Minista bilong Fainans na Treseri, Peter O'Neil na Minister Mark Maipakai.

Ol bikman bilong EWC em Henry Aldorf wantaim vais presiden bilong InterOil, Christian Vinson.

Dispela agrimen i kamap bihain long Pacific LNG Operations Ltd long mun Septemba 2010 i tokaut long kamapim wok patnasip wantaim EWC.

Praim Minista Se Michael Somare i tok amamas long tupela kampani long wok bung wantaim long kamap wantaim dispela agrimen long go het na kirapim LNG projek wok long PNG.

Se Michael i tok olsem em i amamas olsem kain LNG projek i kamap insait long lokal eria we i gutpela na pipel i save stap wantaim bel-isi.

Em i tok gavman i sapotim dispela projek na redi tasol long lukim projek i go het gut na helpim olgeta lain stat long lain papagraun long ples na tu provinsal na lokal level gavman na tu

ekonomi bilong kantri.

Insait long dispela agrimen bai lukim dispela LNG projek i kamapim samting olsem 2.25 trilion ges insait long 15-pela yia. Long givim bek gutpela bekim long sapotim em i givim long helpim wantaim mani, dispela agrimen givim EWC samting olsem 14.5% ol mani i kam long dispela projek taim ol i salim LNG long dispela fektori long Galp provins.

Minista bilong Maining na Petroleum, William Duma i tok olsem dispela kain wok developman em i no isi long kamap na em i tok kain gutpela wok bung namel long ol developa long gat bilip long PNG na mekim ol wok i kamap em i gutpela tru.

Presiden bilong Pacific LNG Operesins Ltd, Henry Aldorf i tokaut olsem dispela agrimen ol i sainim long aste bai givim tok-orait long Liquid Niugini Gas kampani long kamapim LNG fektori bilong em we i wankain olsem ol narapela LNG projek na redim ol LNG long go long ol maket long Esia maket long rekot taim stret.

Em i tok amamas long Sif Eksekutiv ofisa (CEO) bilong InterOil, Philip Mulacek long toktok wantaim em na givim olgeta rekot long wanem wok InterOil i mekim long Galp provins insait long Elk na Antelop. Dispela toktok bilong Mista Mulacek i kirapim bel bilong ol long putim investmen bilong ol long LNG projek long PNG.

Em i tok dispela projek bai lukluk moa long sait bilong gutpela lukaut na was long sait bilong bus, graun na wara na ol i laik mekim bai olgeta lain stekholda i ken kisim helpim na amamas long bihain.



AMAMAS: John Samar (long lep han) wantaim meri bilong em, Anne, i kisim vautsa long Nambawab Tropi Ltd Menesa Chris Elphic. Lukluk i stap em Boroko NWTL Maketing Menesa, Sam Webb.

Marit winim Fone Haus K10,000 soping loto

JOHN Samar na meri bilong em, Anne, i laki lain taim ol i winim K10,000 soping bonanza we Fone Haus, bisnis han bilong Nambawan Trophy Ltd (NWTL) i sponsaim. Fone Haus i save mekim planti wok long sait bilong salim ol mobail telepon.

Dispela laki soping toksave em i Kots i kamapim na i lukim moa long 1000 manmeri long Mosbi i traim.

Tasol dro bilong las Sarere, 5 Februeri, i lukim ol Samar i winim. Long taim bilong kisim vautsa tupela marit i tok tenkyu long God long wanem ol i tok stat long taim ol i givim olpela ka bilong ol, wasing masin, stov na ol arapela samting long pasto poroman bilong ol, tupela i tingting long wanpela taim tupelo bai gat mani long baim ol nupela samting na sapotim tupela yet gen. Na dispela taim i kamap long las Sarere.



Bank of Papua New Guinea

Public Notice

ENGLISH

Application for a Gold Export Licence

To export gold from Papua New Guinea, a company must be granted a Gold Export Licence (GEL) by the Bank of Papua New Guinea (Central Bank). The GEL is valid for the time period specified on it from the date the Licence was granted.

Interested applicants can contact the Central Bank on phone **3227 214/215** for the licensing requirements and other information.

TOK PISIN

Aplikesen long Laisens bilong Salim Gol igo aut long Narapela Kantri

Kampani tasol mas kisim laisens long Benk bilong Papua Niugini bipo long salim gol igo aut long narapela kantri. Laisens bai soim mak bilong laip bilong em na bai stat long det bilong laisens.

Ol kampani husait i laik aplai long dispela laisens mas ringim Benk bilong Papua Niugini long fon namba **3227 214/215** na kisim moa toksave long infomesen yu mas salim ikam wantaim aplikesen.

MOTU

Golo Siai Tanobada Haida Ena Aplikesin

Golo hoihoilaia tanobada (country) haida dekenai ena maoro pepa (Licence), be kampani sibona ese do idia dogoa bona gaukara-laia. Bema kampani idia ura maoro pepa neganai, aplikesin fom (Application Form) abia mai Papua Niugini ena banika badana (Bank of Papua New Guinea) dekenai maoro idia henimu. Maoro pepa ena siahu horana be do ia hedinarai bona ia ena hematama horana danu.

Daika kampani ia ura maoro pepa neganai, boiboi mai Papua Niugini ena banika badana telephone numera **3227 214/215** bona heduru abia.



AMAMAS: PRAIM Minista Se Michael Somare i amamas long apim glas wain wantaim ol kampani eksekutiv bilong InterOil em Sif eksekutiv, Phil Mulacek (lephan) na Henry Aldorf na Stuart Eliot bilong Energy World Corporation long Ela Bis Hotel long Mosbi las wik. Poto: Nicky Bernard

Top sekyuriti gad bilong Pop John Paul 2 i tingim wok bilong em

kam long Zenit Nius Ejensi

HETKWATA bilong Katolik Sios long wol em Vatiken, i gat ol sekyuriti bilong em yet ol i save kolim ol long ol Swis Gad.

Taim hetman bilong Katolik Sios, em Pop, i mekim raun bilong em long Vatiken yet na long ol narapela hap bilong wol, ol sekyuriti gad yet bilong em i save raun wantaim Pop na lukautim em.

Taim nius bilong santuim nau i dai Pop John Paul 2 long mun Mei i kamap, top sekyuriti gad bilong Pop John Paul 2 long 12-pela krismas tasol nau i pinis long wok i stap i stori.

Swis Gad kepten, Roman Fringelli, i bin kisim trening na em i bin redi long lusim laip bilong em tu long Pop. Namel long 1987 na 1999, Kepten Fringelli i bin wanpela long ol 5-pela pesenel bodigad taim Pop John Paul 2 i wokim raun long wol. Long wok bilong em, em bin raun wantaim Pop long 15-pela apostolik wokabaut i go long Esia, Yurop, Afrika na ol Amerika. Long tri na haf long ol yia, Kepten Fringelli i bin bosim ol Swis Gad long ol wokabaut bilong em ovasis.

"Sapos wanpela samting i kamap long putim Pop John Paul 2 long birua, mi bai sakrifaisim mi yet long sevim Pop. Em tingting bilong mi long ol wokabaut," Kepten Fringelli i tok.

Kepten Fringelli i bilong Basel long kantri Swiselan na em bin lusim Vatiken ami bilong Pop we i bin stap yet long bipo taim



VATIKEN SEKYURITI: Dispela em ol Swiss Gad, sekyuriti lain bilong Vatiken na Pop. Long histri bilong Vatiken, dispela ol sekyuriti gad i bilong kantri Swiselan na olil givim sekyuriti long Vatiken long bipo bipo taim yet.

Poto: AAP

long 10-pela yia i go pinis. Tasol em i gat ol gutpela memori we em i amamas tasol long serim ol ekspirians we sampela taim, i gutpela tasol long wankain taim tu, i bin gat ol taim we ol i bungim birua.

Kepten Frangelli i tingim taim long Nairobi, Saut Afrika, we em i singaut long ol ami long Mosambik (Mozambique) long traim hat long kontrolim planti pipel i passim ples long traim lukim Pop. Narapela taim tu em long Seoul, Saut Korea, we em i bin gat bikpela wok long lukautim Pop long planti milion pipel i bin bung long lukim Pop.

"Mi tingim long Rwanda long taim bilong misa lotu mipela i kisim tok lukaut olsem bai i gat teroris atek long balus bai kamap. Tingim, dispela em 4-pela krismas tasol bipo long pait na hevi we ol bin kilim dai planti pipel bilong Rwanda i kamap," Kepten Frangelli i tok.

Long narapela taim, ol i mekim wokabaut long Lesotho, Afrika. Ol i sataim wanpela lapun balus we i bin mekim ron long pundaun long ples balus long Lesotho tripela taim bikos bikpela smok i karamapim ples. Taim dispela i no wok, ol i kisim kar na wokim ron long 5-pela

awa i go long Lesotho. Na taim ol i go kamap, ol gan i pairap taim ol sekyuriti fos i kisim bek sampela hostej o lain we ol man nogut i holim pasim ol. Pop John Paul 2 i bin go long hap long santuim pater, Joseph Gerard na bihain long em, em bin go long haus sik lon g lukim ol lain i bin kisim birua long hevi na ol i stap long haus sik.

"Dispela em i wanpela spesel wokabaut, i nogut tru. Tasol Pop John Paul 2 i bin ofaim mesej bilong pis o belgut pasin," Kepten Frangelli i tingim.

Moa long dispela stori long neks wik.

Wok redi bilong namba 28 Luteran Sios sinod i kamap

OL WOK redi i kamap nau long Goroka, Isten Hailans, long holim bikpela bung bilong Luteran Sios long PNG (ELC-PNG) neks yia, 2012.

Sinot namba 28 em bai ol i holim long Goroka ELC-PNG Distrik nap les ol bai holim em long Nesenel Spots Institut (NSI). Dispela bung bai lukim planti ol Luteran Sios memba long PNG yet na tu, long ovasis.

Siaman bilong sinod komiti long Goroka, Brian Koningi, i tok nau em i wok wantaim komiti bilong mekim ol wok plen long kamapim ol progrem bilong sinod.

"Ol Kristen bilong ol Luteran kongriksen long peris, kongriksen na seket level i go het nau long planim ol gaden kaikai na ol narapela samting moa bilong sinod," Mista Koningi i tok.

Tupela grup i kamap olsem ol namba wan

grup long wokim fan resing na kamapim mani bilong helpim kamap bilong dispela sinod. Em long Rongo Luteran Seket mama grup na Sen John's Seket long taun.

Mista Koningi i singaut long ol sios lida bilong distrik, peris na seket level long wok bung wantaim na wok bilong redim na kamapim sinod i ken ron gut.

- Paulus Tali i raitim



Gutpela tingting i kamapim gutpela samting na gutpela sindaun

GUTPELA tingting i olsem wanpela strongpela lait i no inap dai.

Ol manmeri i laikim em na i wok long painim em tru. Ol inap kisim em isi tumas. Em i save soim em yet long ol manmeri i laikim em; Provep 1: 4

Sapos sampela manmeri i gat liklik save tasol bai dispela tok i helpim ol long kisim gutpela tingting. Na em bai givim gutpela save long ol yangpela manmeri, na soim ol long gutpela pasin bilong wokabaut.

Ol manmeri i kirap long moning taim tru bai i no hat wok long painim dispela gutpela tingting bilong wanem, em i stap klostu pinis long dua bilong ol. Sapos ol manmeri i was i stap na i wok long painim em orait, dispela ol manmeri bai i gat gutpela tingting tru na bel bilong ol save stap isi.

Dispela gutpela tingting i wok long painim ol gutpela manmeri na i laik poromanim ol tru. Maski ol istap long wanem hap, em bai i bungim ol na mekim gut long ol. Na poromanim ol long olgeta tingting bilong ol manmeri i save painim em. Manmeri i laik kisim gutpela tingting, i mas i gat strongpela laik long kisim Jisas Kraus. Ol i save amamas long gutpela na stretpela tingting i kamap long ol.

Na ol manmeri i amamas long em, orait, ol i save bihainim lo na pasin bilong Holi Spirit i save givim long ol. Na manmeri i bihainim ol dispela lo na pasin ol bi i kisim laip bilong i stap gut oltaim. Na ol manmeri i bin kisim laip i stap gut oltaim, ol i stap wantaim God. Olsem na olgeta manmeri i laik kisim gutpela tingting, ol bai kamap hetman insait long kingdom bilong God. Olsem na yupela ol bikpela lida ilaikim tumas pawa na bilas bilong yupela, orait, moa-beta yupela i strong long holimpas gutpela tingting long Jisas Kraus na bai yupela i ken stap lida inap oltaim oltaim.

Provep 3: 4 Sapos yu mekim olsem, orait, God bai i laikim yu na ol man tu bai i laikim yu, na wok bilong yu bai i kamap gutpela tru.

Madang Katolik i gat nupela Asbisop

MADANG Katolik Asdaiosis long Madang provins i gat nupela sios lida nau.

Em long Asbisop Stephen Reichert husat i bin kisim blesing long nupela wok olsem Asbisop bilong ol Katolik pipel insait long Madang long las wik Trinde, Februari 2, insait long wanpela sios seremoni long Holi Spirit Katitrel long Madang yet. Em i kisim ples bilong Asbisop William Kurtz husat i bin hetman bilong Katolik Sios long Madang long 10-pela yia i go pinis. Em bin abrusim 75 krismas na risain long wok bilong em las yia we hatman bilong Katolik Sios long wol, Pop Benedict 16, i bin tok oraitim.

Asbisop Stephen i gat 67 krismas na em i bilong Leoville long Kansas, Amerika. Em i namba tri

long 7-pela pikinini nau i dai Arnold na Louise (Zodrow) Reichert bilong Leoville long Decatur Kaunti.

Em bin mekim skul seminari long Fransesken Kapusin Oda long 1963 long Indianapolis na mekim promis na kisim blesing long kamap pater long 1969.

Ol wanskul na gutpela poroman bilong em long seminari yet em i save toktok wantaim em long nupela bisop bilong Kimba Katolik Daiosis, Bisop William Fey O.F.M. Cap, Kadinel Sean O'Malley O.F.M. Cap em Asbisop bilong Boston long Amerika na Asbisop bilong Denver long Amerika yet, Asbisop Charles Chaput, O.F.M.Cap.

Asbisop Stephen i bin kamap long yangpela yet bilong em

long PNG long 1970 na wok long ol Katolik peris insait long Mendi Daiosis olsem long Pombarel, Tari, Det na Wara. Long 4-pela yia, em bin tisa long Holi Spirit seminari long Bomana ausait long Pot Mosbi siti. Em bin wok long Kapusin Misin Kaunsel long 12-pela krismas na supiria bilong misin long narapela 6-pela yia.

Asbisop Steven i bin bisop bilong Mendi long 15 yia na tu, presiden bilong Konpres bilong ol Katolik Bisop bilong PNG na Solomon Ailan (CBC) long 5-pela yia, stat long yia 1995 inap long 2001. Stat long yia 2008, em i stat olsem vais presiden bilong CBC.

Noken sotkat tasol strongim wok long inapim skul

Paulus Tali i raitim

TRIPLELA nupela na yangpela pasto i kisim salens long go autim Gutnius na kisim lait i go long ol seket, peris na kongriksen ol bai wok long en.

Pasto Terry Ben, Mathew Amgko na Gideon Joshua em tripela nupela pasto i bin kisim blesing las wik insait long wanpela odinesen seremoni long Wampar Evanjelikel Luteran Sios (ELC-PNG) bilong PNG long Yabim Distrik, Morobe provins. Tripela i bin greduet long Logaweng Luteran Seminari long Finsafen insait long Morobe provins yet.

Hetbisop bilong ELC-PNG, Reveren Girgere Wenge, i bin go pas long odi-

nesen na givim blesing long tripela yangpela pasto.

Reveren Wenge i bin tokim ol Kristen long lukaut long ol lain i autim tok bilong God long strit olsem ol i sotkat lain.

Olsem na em bin tokim tripela nupela pasto long "yupela i noken sotkat, tasol yupela i kisim trening long 5 na 6-pela krismas long tioloji i mas go na strongim wok bilong Gutnius.

Pastaim presiden bilon g Yabim ELC-PNG distrik, Reveren Gedisa Okamaisa i bin autim toktok na i tokim ol Kristen olsem Tok bilong God em i ken kamap olsem banis n a umbeng na soim lait long ol narapela long kamapim senis.

Wok painim i painim ol meri fama i laik go insait long bisnis

Barbara Tomi i raitim

WANPELA sevei o wok painim aninit long projek, "Kamapim gut wok bisnis bilong ol PNG Meri i stap insait long liklik Hotikalsa bisnis, i painim olsem i gat sampela meri long hatwok bilong ol yet i kamapim na maketim sampela ol top lokol prut na kumu wantaim tu ol flawa.

Planti bilong ol i wok long groim na mekim ol samting wantaim ol dispela kaika, tasol wantaim nogat meknais na nogat helpim i kam long ausait. Helpim ol i kisim em long ol famili bilong ol. Na ol i wokim ol dispela long lukautim ol famili bilong ol.

Sampela long ol dispela meri bilong hatwok em yumi ken painim long Sentrel provins we ol i groim ol naispela na switpela watamelon long hap bilong ol. Long Morobe, ol meri i lukautim ol meme o sipsip long wul o gras bilong ol, lukautim ol bi long kisim hani na long hailans, ol meri ya i wok long pulapim maket wantaim ol kat flawa, groim, trenim na saplaim ol Afrika yam sit o pikinini long planim na pekejim ol ogenik kopi long salim i go ovasis.

Ol dispela meri i bin kam wantaim long ol wan wan rijen long go

insait long wanpela sevei wok we Cathy McGowan na Val Lang bilong Wimen long Agrikalsa grup long Australia i bin wokim long Lae, long glasim membasip bilong top agrikalsa bodi bilong kantri, em PNG Wimen long Agrikalsa Dvelopmen Faundesen (PNG-WiADF). Dispela em long skelim strong bilong ogenaiesen na ol wok em i mekim, ol meri i lukim ogenaiesen olsem wanem, glasim sait bilong gavanens long PNGWiADF na sapot ol i laikim long ogenaiesen. Ol projek patna, Fres Probus Dvelopmen Ejensi (FPDA) na Nesenel Agrikalsa Risets Institut (NARI) i bin helpim Misis McGowan na Lang long kam na ranim dispel woksop bilong ol meri fama long PNG.Presiden bilong PNGWiADF, Maria Linibi, i bin go pas long ol sevei long ol wan wan meri fama grup. Na Misis McGowan bai kisim ripot i go long Profesa Barbara Chambers bilong Kenbera (Canberra) Yunivesiti na em bai kisim i go long Intanesel Agrikalsa Risets (ACIAR) long fandim o givim mani bilong projek.

Moa long 20 grup i rejista pinis, 10-pela wan wan meri na planti ol narapela meri i gat laik i bin go insait long sevei wok. Na ol i bin autim laik bilong ol na wokim ol



BAUKA KOFI: Marey Yogiyo i soim sampela kopi peket ol i redim na salim.

rekomendesen long ol rot we PNGWiADF i ken sevisim laik bilong ol long promotim ol kaikai, kumu, ol flawa na ol diwai kes krop samting.

Planti ol meri i bin autim wari olsem gutpela komyunikesen sistem i mas stap, trenim, maket na hap bilong kisim dinau long statim ol bisnis em ol bikpela samting i save stopim gutpela wok go het long ol wok ol i mekim.

Piksa em, Julie Anton bilong Maun Wilhem husat i bin go long

Goroka long stap insait long woksop wantaim bilip olsem PNGWiADF bai putim em long netwok long maketim ol hailans okid bilong em. Narapela meri Garaina long saut bilong Lae, Morobe provins i bin wokabout klostu long wanpela wik long painim grup bilong em long Bulolo Distrik na ol i wokabout wantaim i go long Lae we ol bin sindaun long stap insait long sevei. Bikpela samting dispela meri Garaina i laikim em long grup bilong em i mas kisim trening logn groim ol gutpela kumu long dispela maket i op na wet i stap long eria bilong ol. Dispela em long ol maining taun olsem Bulolo na Wau.

Marey Yogiyo em narapela meri i bin sindaun long Goroka bung i laik kamap kopi fama tasol em i laik strongim ol narapela meri long groim na drinim kopi bilong ol yet.

Yagiyo na famili bilong em i save groim ogenik kopi long Aiyura Veli bilong Isten Hailans

provins. Ol i save mekim na salim long ol riteil stoa long eria. Dispela nupela kopi em ol i kolim Bauka Blue Kofi we i resis wantaim ol biknem kopi olsem Kongo Coffee, Goroka Coffee Roasters na Sigr Coffee. Inap nau, Bintangor Trtading long Goroka i salim prodak bilong em. Dispela em liklik lain ol meri i bin stap insait long sevei wok tasol i gat sampela moa i stap we ol i no painim ol yet.

Ol lain i karimaut sevei i amamas long infomesen o ripot ol i bungim bikos dispela nau bai helpim long wokim ol plen long etresim ol wari na wok ol meri long agrikalsa i gat long em long mekim ol i ikwal patna long wok developmen bilong agrikalsa long kantri. Olsem hap bilong ripot, sevei grup bai wokim rekomendesen i go long ol lain i kamapim projek olsem i mas gat "capacity" trening o ol meri i mas gat trening bilong ol meri long wanem, planti grup i laikim dispela.

Em i samting nau bilong PNGWiADF long yusim dispela infomesen o ripot long inapim ol samting we bai helpim ol meri na tu, long kisim i go long ol bikman long gavman olsem PNGWiADF em i maus bilong ol meri i kamapim kaikai. Ful ripot bilong sevei wok bai kamaut long mun Me long dispela yia.

Awenes i helpim ol meri Nicaragua

Moa long stori bilong ol meri long kantri Guatemala, Saut Amerika, we ol i save kilim nating ol meri. Namba wan hap i bin kamap long dispela pes las wik.

LONG ripot bilong CEDEPA em Centro Evangelico de Estudios Pastorales en Centro America i wanpela NGO we i patna wantaim Wol Asosiesen bilong Kristen Komyunikesen (WACC) i kamapim dispela ripot i autim olsem long las yia yet, ol bin kilim moa long 750 meri long Guatemala, wanpela kantri we i save stap long hevi long sosel sait na politiks tu long 35 yia nau.

CEDEPA i mekim klia mining bilong "feminicide" o pasin bilong kilim dai nating meri olsem em i wanpela politikel tem o wod we i sut long ol man i wokim dispela na stet. Insait long dispela, em ol judisel sistem o ol kot bikos ol i no mekim samting long stopim dispela samting na tu, ol i no wokim samting long lukautim ol meri husat i sitisen bilong kantri.

Ripot i tok long 35 yia we

Guatemala i stap long sivil woa, planti tausen meri em ol i repim, bagarapim na kilim ol i dai. Vailens agens long ol meri i kamap bikpela long taim bilong woa. Ol bin trenim planti tausen man long kilim dai ol meri na ol no bin kisim sampela kaunseling long salensim ol long ol samting ol bin mekim.

WACC na CEDEPA i karimaut ol awenes nau long skulim ol meri long ol ligel rait bilong ol na tu, long menesim ol kain situesen we ol man i kamapim long ol.

"Mi bin kisim bikpela pen na hevi long tingting na bodi long han bilong man bilong mi husat i save paitim na mekim mi nogut. Tasol nau mi sindaun long woksop na lainim planti samting mi no bin save pastaim. Nau mi save olsem mi tu mi wankain olsem ol man na mi no inap larim man i mekim nogut long mi. Dispela ol woksop i helpim mi gut tru na mi helpim tu ol narapela meri husat i kisim wankain hevi olsem mi," wanpela meri nem

bilong em Amerika bilong Guatemala i tok.

Narapela meri nem bilong em Onley, taim em i autim tok amamas i go long WACC na CEDEPA long woksop we i helpim tru ol meri long save long ol rait bilong ol, i tok em no bin save olsem i gat lo na lain bilong kisim helpim long ol taim ol man i paitim meri narakain. Na tu, long ples we ol i ken kisim helpim long en.

"Tenkyu WACC na CEDEPA na nau mi senis. Na man i no mekim mi nogut o paitim mi planti olsem pastaim," Onley i tok.

Sandra i tok bikpela pen, hevi na ol man i mekim ol meri nogut em laip we ol meri long Guatemala i save stap long en, tasol gutpela tru long ol woksop hia i helpim gut planti meri.

"Mipela i no save olsem wanem ol kain pen na hevi mipela i karim em ol vailens. Mipela i save ting olsem em nomol laip tasol. Nau mipela i ken go long ol atoriti na lo taim dispela kain hevi i kamap," Sandra i tok.



BILUM SENTA: Maria Linibi na Cathy McGowan i raun lukim ol meri i salim bilum long Goroka na askim ol long joinim PNGWiADF netwok.

Poto: Cathy McGowan

GLOBE BRAISED STEAK & ONIONS

More Easy
More Tasty
More Energy



GLOBEthe perfect choice



YUMI na HIV
WANTAIM
Fr Jude Ronayne
Forde OFM

Skul na HIV

NUPELA skul yia i kirap na ol papamama i wok long redim ol sumatin long go skul long dispela yia. Ol i wari long baim skul-fi, klos bilong skul na ol arapela samting olsem skul-bek, buk, pen na pensil.

Ol tisa tu i bisi long redim ples-skul, ol klasrum na ol skul lesen bai ol pikinini i ken kisim gut edukesen bilong ol.

Tu, bai ol skul-bod bilong wanwan skul i mekim kainkain loa bilong was gut long laip na wok bilong ol tisa na sumatin wantaim. Ol i laik bai ol tisa i sindaun gut na mekim gut wok bilong ol. Skul we tisa i givim insait long klasrum em wanpela samting, tasol pasin bilong tisa insait na ausait long skul ples em narapela samting. Nogut pasin tisa i mekim ausait i pait wantaim skul tisa i givim long klasrum!

I wankain long ol sumatin. Ol skul i gat kain kain lo ol sumatin i mas bihainim long taim ol i stap long yunifom bilong skul na long wokabaut i go i kam long skul.

Wari bilong mi i stap planti yia nau em long HIV long skul. Tru, planti tisa i kisim HIV pinis. Ating i mas yia 2001, mi bungim tisa i HIV pinis. Man i sik, na i nogat gutpela marasin bilong kontrolim dispela sik (ART) long dispela taim. Em i dai pinis long taim nau! Bihain mi bungim planti tisa, man na meri, i kisim HIV. Sampela i laki tru na dring marasin (ART) na ol i wok-tisa i stap yet. Yes! i tru! i gat tisa i HIV pinis i wok i stap na skulim ol pikinini bilong yumi. Na em i gutpela, sampela ol i stap yet na mekim gut wok bilong ol. Tasol, sampela tu i karim bikpela hevi na i sem long go insait long klasrum na skulim ol sumatin. Ol i pilim laip bilong ol i bagarap na ol i laik hait. Tasol, yumi nidim tu ol tisa i save long hevi bilong HIV na i save marimari long ol sumatin.

Wanem kain tisa i HIV pinis? Sampela i yangpela, ol nupela lain tisa. Planti i marit pinis; papamama pinis. Ol i winim planti yia pinis long wok-tisa. Sapos ol i dring marasin na i kisim sapot long komyuniti, em i gutpela. Ol inap mekim gutpela wok tisa. Tasol sapos sampela i kisim sik namel long skul yia, i gat sapot long Tising Sevis tu o nogat? Na i gat narapela tisa i sambai redi long kisim klas bilong ol long skul? Nogut, tisa i sik i stap na ol sumatin i sindaun nating insait long klasrum bikos i nogat tisa. Nau, bikpela wari i stap. Lo bilong HIV, ol i kolim HAMP Act, i tambuim yumi long tokaut long husat i HIV. Hau bai yu lukautim tisa sapos yu no save em HIV pinis?

Na, olsem wanem long ol sumatin? i gat planti sumatin na papa o mama, o tupela wantaim, i HIV pinis. Dispela

kain famili i painim hat long baim ol skul-fi samting na lukautim pikinini. Mipela i bin helpim sampela famili, long planti yia nau, tasol dispela yia mani i sot na mipela i wok long painim K25 tausen moa long pinisim dispela wok bilong yia 2011.

Nogut sampela tisa o wan-skul i tok bilas long ol dispela pikinini. Sampela tok, olsem: "Ol AIDS kids" em nogut olgeta na i no helpim pikinini o skul. Ol tisa tu i mas save na marimari long ol, taim papa o mama i sik o i gat narapela hevi long haus bilong ol. Mi mas tokaut gen, dispela HAMP Act i mekim hat long tok save long ol tisa long hevi dispela sumatin na famili i karim.

I gat sampela ol sumatin i HIV pinis tu o nogat? Yes i gat!! gat skul-pikinini i HIV pinis.

Sampela i stat long go long skul nau. Planti i stap long Prep-skul. Ol i kisim HIV long mama bilong ol, taim mama i karim ol. Planti bilong ol i dring marasin (ART) pinis na ol i luk olsem ol arapela wanklas bilong ol. Ol i fit, tasol, tisa i mas was long ol bikos HIV i stap. Olsem na taim bilong eksiden long pilai o wok o sumatin i kros na pait, ol tisa i mas was long blut. Blut i kapsait em nogut bikos blut i gat HIV insait long en. Olsem na ol skul i mas i gat tisa i save long first-aid na i gat first-aid-kit long skul.

I gat sumatin i HIV pinis long Gred 3 i go antap long Gred 12. Lukim we ol i kisim HIV:

- Sampela i kisim long mama, taim mama i karim ol;
- Wanwan i kisim long eksiden - i no planti;
- I gat sampela i kisim taim man i mekim pasin nogut long ol taim ol i pikinini, insait o ausait long famili, o abius long tisa - o long ol "sugar-daddy", o long seks-wok bilong painim skul-fi;
- I gat sampela i kisim long pren-pasin namel long ol wan-skul na wan-yia na long ol boipren na gelpren.

Lukim! Sori, tasol i gat sampela SKUL i HIV pinis! Mi yet mi save long sampela skul we sampela sumatin i HIV pinis na i wok long pilai nabaut wantaim ol arapela sumatin. Em olsem, ol i givim sik HIV long ol wankul bilong ol. Na mi no inap go long skul na tokim Hetmasta bikos HAMP Act i pasim maus bilong mi! Na mi no inap go long skul na tokim ol tisa - "Dispela boi o gel i save mekim olsem, olsem!" I gat sampela SKUL i HIV pinis! Yumi save, wari i stap! Bai yumi mekim wanem samting nau? Bod Manesmen, ol Hetmasta na Edukesen Dipatmen mas luksave long dispela wari na painin rot bilong stretim dispela wari.

God i blesim yumi olgeta.

Strongim TVET sekta

Veronica Hatutasi i raitim

I GAT bikpela wok bilong kamapim gut na mekim bikpela Teknikel na Vokesenel Edukesen Trening (TVET) sekta long PNG long kisim ol wok we i kamap nau long ol maining, wel na ges sekta.

Dispela ol toktok i bin kamap long wanpela ripot we ol risets lain bilong Ne-

senel Risets Institut (NRI) i bin karimaut na lonsim long las wik Fonde.

"Edukesen Dipatmen i gat bikpela wok long mekim insait long TVET Divisen lon g kamapim gut ol wok long ol pablik teknikel kolis na ol vokesenel senta insait long ol provins. Dipatmen i mas sapotim gut teknikel na vokesenel edukesen na trening institusen na em bai inap long redim na

kamapim ol inap woklain long (trening na menesmen) mekim wok long planti ol wok developmen i wok long kamap nau long kantri.

"TVET i mas fainalaisim opinisim wok long kamapim gut level bilong ol kos na bai i gat ol sotpela kos lon g ol program eria long olgeta TVET institusen. Olsem na em i bikpela long kamapim

rifom sata bilong ol vokesenel senta.

"Dispela bai givim kliapela stia na wok long kisim trening long wok i go antap moa. Em i bikpela samting long strongim moa wok na developmen long menesmen level (ol superintenden, ol prinsipel na menesa) bikos dispela bai lukim sistem i kamap strong na wok gut," NRI ripot i tok.

Helt na stretpela tingting bai helpim gut man

...Man i mas senisim pasin

LONG GAT gutpela laip, man i mas gat balens long stap helti taim em i eksasais, kisim rait kaikai, gutpela na stretpela tingting na wankain tu long spiritual sait.

Pastaim Gavana Jenerel (GG) bilong PNG tasol nau i pinis i bin tok olsem long tok gutbai bung wantaim ol poroman, famili na ol woklain bilong opis bilong GG long las wik Fraide.

Se Paulias i bin wanpela man bilong hatwok GG husat long wok na laip bilong en, em i save toktok na go hetim strong helti laipstail na gutpela tingting we eksasais, gutpela kaikai na lukluk long Bikman Antap em ol bikpela samting man i ken mekim long gat gutpela na longpela laip.

Se Paulias i bin tokim ol lain i stap long tok gutbai seremoni olsem em i lapun man we klostu bai i gat 80 krismas, tasol sikret long gat helti laip we yu ken stap amamas long en em long gat rait bodi na



SE PAULIAS MATANE: Promotim gutpela helt na stretpela tingting na gutpela pasin. *Fail Poto*

tingting i stap stret.

Se Paulias i bilip olsem lon g gat helti bodi we man i eksasaisim olgeta taim,

givim rait kaikai na tingting i stret i nogat pasin bilong jeles na gridi we i gat balens long fisikel na spir-

itual sait, man i ken stap longpela taim.

Long wankain taim, em bin strongim tok lon g pipel bilong dispela kantri i mas senisim pasin na tu, wokim plen long laip taim ol i kamapim ol gol na go hetim long gutpela rot.

Se Paulias i bin kisim wok olsem GG long 2004 na em i bin wokim sampela gutpela senis long opis bilong GG. Em long holim eksekutiv bung olgeta Mande, 25 minit opis felosip na helt wok bilong GG wanpela taim long wanpela mun.

Sif Sekreteri Tipo Vuata i makim ol woklain long opis bilong GG i bin tok tenkyu long Se Paulias long gutpela lidasip na stia we em i bin givim ol woklain taim em bin stap GG bilong PNG.

Se Paulias i wanpela raita i toke m i lusim Mosbi long dispela wik bilong go long asples bilong em long Is Nu Briten provins long wok wantaim pipel bilong em na skruim raiting bilong em.

PNG bai kisim trening long Top Pablik Helt skul long wol

OL YANGPELA environmen helt saientis na ol narapela lain i wok long sait bilong pablik helt inap long go skul long wanpela top yunivesiti long wol na skruim save bilong ol long helpim long ol wok developmen bilong kantri.

Helt Sekreteri, Dokta Clement Malau, i tok Havad Yunivesiti Skul bilong Pablik Helt long Amerika, em dispela skul we i ken helpim PNG long bungim ol ripot long ol hevi we maining i kamapim long helt bilong man.

Long yia 2007 i kam inap nau, Dokta Malau i bin wokim 8-pela raun i go ovasis long ol miting na

ol bikpela bung long rijinel na intanesenel level.

Wanpela long ol em long raun i go long Amerika we Nesenel Helt Dipatmen nau i kirapim wok poroman wantaim wanpela top skul long wol, em Havard Skul bilong Pablik Helt.

Long dispela wokabaut tasol em PNG Helt Dipatmen i stat long toktok wantaim ol environmen helt saientis long Havard Skul bilong Pablik Helt bilong ol long helpim bungim ol ripot long hevi we maining i kamapim long helt bilong man.

Dokta Malau i tok dispela arenj-

men bai helpim Helt Dipatmen long long givim gutpela edvais i go long gavman bilong kamapim gutpela stendet long maining long lukautim pablik helt.

"Koneksen o wok wantaim Havard Skul bilong Pablik Helt bai helpim ol yangpela pipel bilong yumi long kisim top trening stret yumni no inap kisim long narapela hap long wol. Ol pipel bilong PNG i mas gat sans long kisim top skul na trening we wol i givim long en. Na kisim trening ausait long kantri bai giivm moa velyu long skruim ol wok developmen bilong dispela kantri," Dokta Malau i tok.



RAUSIM OL KARAMAP: Rausim graun , ol banana lip, ol bek na inap long waitpela laplap karamap nau.

Waitangi De

Veronica Hatutasi i raitim

LAS WIK Sande i bin naispela de tru. Tasol long moning taim, i bin luk olsem bai gat ren long apinun long wanem, sampela waitpela klaut i bin haitim blu skai, tasol taim de i ron, san i kamap strong na rausim ol blekpela na waitpela kilaut na naispela blupela skai i stap inap long nait i kamap.

Dispela de, Februeri 6, i bin lukim Nu Silan komyuniti long Mosbi na ol poroman bilong ol long PNG na ol arapela kantri, i selebretim nesanel de bilong ol ol i kolim long Waitangi De.

Waitangi De i makim dispela de long yia 1840 long histri bilong Nu Silan we ol waitman i bin go sindaun long Nu Silan i bin wokim belgut pasin wantaim ol asples Polinesia Maori pipel bilong Nu Silan yet na sainim triti o agrimen long pinisim olgeta pait na bel nogut na stap gut wantaim. Bihainim dispela triti, tupela grup i save stap pren tru i kam nau.

Nu Silan Hai Komisn long Mosbi i stap baksait long Haus Palamen klostu long Waigani Ats Senta na Golp Klub. Bikpela eria insait long Hai Komisn graun i gat planti diwai, flawa na grinpela Sogeri gras em dispela naispela hap we klostu 200 pipel i gat long em ol famili,

pren na wantok bilong Nu Silan na ol woklain bilong Hai Komisn we Hai Komisina Marion Crawshaw, i go pas long em i bin bung long selebret na amamas sea, toktok, harim musik na kaikai "hangi" o umu (long tokples Samoa) o mumu (long PNG).

Hai Komisn i bin askim midia tu long go selebret wantaim ol long bikde bilong ol we long Nu Silan yet na long narapela hap long wol we ol Nu Silan lain i stap na wok long en i bin kamapim wankain selebresen.

As long bung na selebret

"I nogat ol bikpela toktok bai kamap, tasol Nu Silan komyuniti long Mosbi na ol famili na poroman i gat sans long bung amamas na sea wantaim. Waitangi em i de bilong luksave na amamasim de olsem mipela ol pipel bilong Nu Silan." Hai Komisina Mis Crawshaw i tok.

"Olsem sosaiti, mipela i bung na pas wantaim olsem wangepela pipel long Nu Silan," Mis Crawshaw i tok.

Populesen o mak bilong pipel long Nu Silan em 4.2 milion. Long dispela, 15 pesen em ol asples Maori, namel long 10-15 pesen em ol Pasifik Ailan pipel i kam long Kuk Ailan, Samoa, Fiji, Tonga, Niue, Tokelau na ol narapela liklik ailan moa. Nu Silan em dispela kantri long wol we i gat bikpela mak bilong ol Pasifik Ailan pipel i

stap long en. Na ol i stap amamas olsem wangepela malti intanesenel komyuniti.

I gat moa long 2,000 Nu Silan pipel i stap na wok long olgeta hap bilong PNG long praivet sekta, ranim ol bisnis kampani, gavman, sios na ol Non Gavman Ogenaisesen.

Nu Silan Hai Komisn long Mosbi i gat samting olsem 25 woklain long en. Sevenpela e mol lain Nu Silan yet na ol narapela em ol wok manmeri bilong PNG i wok olsem fultaim na pat taim.

Planti ol PNG lain i wok wantaim Nu Silan Hai Komisn i wok longpela taim long hap. I luk olsem gutpela pasin, luksave na pren pasin bilong ol Nu Silan pipel we i save mekim ol dispela PNG woklain i pas na wok i stap long hap.

Oi Kiwi Klub memba long Mosbi i bin go pas long putim kamap selebresen na ol ektiviti na kaikai long amamasim Waitangi De long Mosbi. Ol volantia namel long Nu Silan komyuniti i ranim Kiwi Long tude, klub i gat 60 memba long en. Insait long wangepela yia, klub i save go pas long tripela bikpela samting. Namba wan em long Waitangi De hangi o bikpela umu bung kaikai, em tumbuna kuk kaikai bilong ol Kiwi we ol i save bung olgeta yia long naispela ples aninit long diwai long Hai Komisn graun na amamas stori na serim. Narapela em long Bledisloe Kap fansen long Julai/Ogas na laspela em long Kiwi Klub Bal ol i save holim bihain long tupela yia.

Hangi o mumu

Bikpela hap bilong Waitangi De selebresen em bikpela bung kaikai, "Hangi" o mumu. Olsem ol narapela Pasifik Ailan kantri, PNG tu i save wokim mumu, tasol ol i gat kain stail o rot long wokim mumu. Ol rot i klostu wankain na taim mumu i kuk pinis, em i smel na teis wankain.

Dispela ripota i bin go lukluk taim ol volantia bilong Kiwi Klub memba husat i bin kirap long Sarere nait na redim na wokim mumu, i rausim long hol long redi long kaikai.

Ripota i laik glasim rot na stail we ol Kiwi i wokim mumu bilong ol.

Ol piksa i soim ol rot long mekim mumu, putim long hul, autim taim em i redi na ol manmeri na pikinini i kaikai. Mumu i kisim 4-pela awa long kuk na redi long kaikaim.



OL STIL AIN BAL: Yusim ol dispela olsem ol ston long mumu wantaim



KISIM KAIKAI NAU: Ol meri pikinini i go pas long kisim kaikai.

long PNG

■ i kam long pes 10

Samting long wokim pastaim em, long digim hul inap long samting olsem 6 na 7 fit i go insait long graun na ol sait sait bilong em, bikpela inap long putim ol karamap kaikai long trei i go insait. Na man i gat inap spes long rausim mumu taim em i kuk.

Namba tu em, lainim ol ston insait long hul na wokim paia antap long ol ston long mekim hot. Long dispela mumu, ol i yusim ol blekpela raunpela stil (steel) ain bal olsem ol ston na ol sakol olsem ol paiawut long hotim ol stil bal na bai ol kaikai i kuk.

Namba tri em, taim ol ston i wok long hot, ol i redim ol kaikai na putim ol long ol mes waia o long dispela mumu, ol i yusim ol stil ain skwea trei. Wanpela trei kaikai i gat kaukau, ol i rausim skin long en, pamkin sit ol i katkatim na potato ol i wasim gut tasol skin i stap yet long en. Narapela trei ol i putim ol mit we ol i marinetim

pinis o putim ol sos na ol narapela samting long mekim ol mit i smel na teis nais. Narapela tupelo trei em ol i lainim ol (whole) o wan wan kakaruk we ol i no katim i go insait. Ol i marinetim ol pastaim wantaim ol sos na ol narapela gutpela samting long mekim ol i smel na teis nais. Na ol i putim ol pilings olsem tasol taim ol i laik rostim ol kakaruk long en.

Olgeta ol dispela kaikai em ol i karamapim wantaim ol waitpela aven beg na putim i go insait long ol trei. Ol i no putim kokon as gris o wel (oil) long ol kaikai tasol tuhat na gris bilong ol samting ol i putim long marinetim bai wokim ol i sof na i kuk.

Namba foa em, taim ol ston o stil ain bal i hot gut na redi, ol i rausim ol sakol na putim ol wan wan trei kaikai i go insait.

Namba 5 em, ol i karamapim ol kaikai wantaim sampela banana lip na klinpela nupela waitpela laplap. Antap long dispela, ol i karamapim wantaim ol nupela

kopra bek. Bihain long ol i karamapim gut wantaim ol bek na lukim olsem nogat hit (heat) o win i go ausait.

Namba 6 na las long en, em ol i karamapim wantaim graun na lusim i kuk long 4-pela awa we yu ken lukim ol piksa long dispela yami na naispela mumu i smel gut tru na teis wankain tasol olsem mumu we yumi long PNG i save wokim long en.

Ol manmeri na pikinini i bin gat gutpela taim long sanap long lain na kisim ol kaikai ausait long Hai Komisina graun, stori, harim wanpela ben i pilaim ol naispela singsing na kaikai naispela na switpela hangi o mumu. i bin gat planti kaikai, ol prut, sof dring, ol bia na wain samting long amamasim dispela Waitangi De long wei yet bilong ol Nu Silan Kiwi na Maori pipel husat i stap gut wantaim olsem ol pren na wanpela pipel insait long 170 krismas nau.



LUKLUK: Ol famili i sanap lukluk taim ol wokman i autim mumu long hul.



HAI KOMISINA: Marion Crawshaw i sindaun rileks i stap long Waitangi De selebresen.



TOK PISIN NEWS
from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Ol Somali pairret kisim kago sip

OL LAIN raskol man bilong Somalia long Afrika, o ol pairret, I bin kisim na holim wanpela bikpela kago sip bilong Saina, arasait tasol long basis bilong Al-Hudaydah, long kantri em ol i kolim long Yemen.

Gavman bilong Yemen i tok, dispela stori tru, olsem ol pairret bilong Somalia i bin go insait na kisim dispela bikpela kago sip bilong Saina em ol i kolim long 'Tien Hau' taim em i bin wok long ron olsem 11 notikal mails arasait long Al-Tair ailan long Al-Hudaydah provins.

Ol dispel pairret i bin go insait long dispel kago sip na ronim i go olsem long ol nam-bis bilong Somalia.

Ol i statim pinis wanpela wok painimaut long lus bilong dispel kago sip na tu ol bos kru bilong en.

Presiden askim ol kantri long toktok long Isip trabel

PRESIDEN bilong Amerika, Barack Obama, i askim pinis ol lida bilong Jemani (Germany), Briten (Britain), na Yunaitet Arab Emirets (United Arab Emirates) long sindaun na toktok long ol bikpela political trabel em i wok long kamap nau long Isip (Egypt), na tu long ol i mas lukluk long senisim na stretim ol wok politik long dispela kantri.

Amerika palamen o Wait Haus, i tok olsem pasin em planti lida bilong pati bilong Presiden bilong Isip, Hosni Mubarak long lusim ol wok bilong ol, em i wanpela gutpela tingting.

Namel long ol lida husat i bin lusim ol wok bilong ol, em pikinini man bilong Presiden, Gamal Mubarak.

Tasol Wait Haus i tok olsem ol i mas mekim planti moa senis long ol wok politik long Isip, bilong soim olsem ol i bihainim ol bikpela askim bilong ol pipel, husat i wok long mekim ol protes agensim gavman. Ol pipel i bin statim ol protes agensim gavman bilong Mista Mubarak, moa long tenpela de i go pinis.

Australia tingim bikpela paia long Viktoria long 2009

DISPELA wik ol pipel bilong Viktoria i bin gat wanpela lotu bilong tingim namba tu yia bihainim bikpela paia i bin kilim planti pipel tru long Viktoria long 2009. Ol i bin mekim dispela lotu long Melbon, bilong tingim ol pipel na ol samting i bin lus long ol paia em ol i bin kolim long Black Saturday buspaia.

Ol pipel husat i bin ronawe na i no bin dai long ol dispela buspaia i bin joinim Australia Praim Minista Julia Gillard, Gavana Jeneral Quentin Bryce, na ol narapela komyuniti lida long makim na tingim 173 pipel husat i bin dai long namba 7 de bilong mun Februeri 2009.

Reveren Jim Pilmer, i bin tokim dispela lotu, olsem maski tupela yia i lus pinis bihainim dispela bikpela paia, i gat bikpela sore na belhevi i stap yet long komyuniti.

Moa lotu i bin kamap long planti hap insait long Viktoria stet.

Planti Viktoria pipel i lusim gen ol haus



KRAI: Praim Minista bilong Australia, Julia Gillard, i passim aiwara bilong em taim em i toktok long salim belsore bilong gavman i go long ol lain turangu long Kwinslen na Viktoria, husat i lusim laip na sindaun nogut bihain long haiwara i daunim ol.

PLANTI pipel bilong Viktoria (Victoria) long Australia i stat gen long ronowe lusim ol haus bilong ol bihainim ol taitwara.

Tasol ABC niusmeri, Peta Carlyon, i ripot olsem i luk olsem ol haiwara i wok long go daun pinis long sampela arapela hap bilong stet.

Ol i rausim ol pipel long samting olsem 80 haus long Irymple, klostu long Mildura, bihain long ol wara long ol stomwara kesmen i bin go antap na ol wara pa mi no bin inap long pamim na rausim ol wara long ol rot.

Gavman i tok olsem ol i wari olsem ol pipia bilong ol toilet o haus pekpek bai nap kapsait nabaut na go insait na bagarapim ol wara, na ol i wok long givim tok lukaut i go long ol pipel long noken go na wokabaut nabaut long ol dispela wara.

Ol i bin tokaut tu olsem ol i wari long liklik taun bilong Skipton, em i stap long sautwes long Ballarat, we Maunt Emu Creek i wok long go antap na ol i ting em bai kamapim sampela bagarap long sampela haus.

Tasol wanpela mansave o haidrolojis, Philip Douglas, i tok i luk olsem ol haiwara i wok long go daun pinis long planti narapela hap bilong stet.

Ol lida long Kwinslen i no wari long nupela taim nogut

PREMIA bilong Kwinslen (Queensland) i tok gavman bilong en i no wari tumas long wanpela nupela taim nogut o weda sistem i wok long kirap na kamap strong long ol solwara bilong Pasifik.

Australian Wetha Buro i tok olsem, i luk olsem sampela saiklon i ken kamap yet insait long ol dispela mun i kam, tasol wanpela taim nogut em i wok long kamap nau long ol hap olsem saut is Fiji bai no inap

kamapim bagarap long Australia.

Premia Anna Bligh i tok olsem, bai ol i was gut long dispela taim nogut, tasol em i no ting dispela taim nogut bai hamarim Kwinslen.

Filipins i gat nupela muslim trabelman lida

WANPELA komanda bilong ol Muslim trabelman em ol i save ting i save stopim tingting na wok bilong kamapim gutpela bel isi na sindaun long Mindanao, ailan long saut bilong Filipins (Philippines) i lusim pinis lain bilong Moro Islamik Liberasen Fran na kirapim lain bilong en yet.

Dispela i kamap long wankain taim em ol i statim gen ol toktok namel long gavman bilong Filipins na Moro Islamik Libaresen Fran.

Dispela tokman bilong Filipins ami long tok olsem ol sekyuriti fos bai go het yet long traim long kisim dispela komanda, long wanem ol i tok em tasol i bin go pas long ol wok bilong kamapim ol bikpela trabel na kilim planti pipel long yia 2008.

Lida bilong Moro Islamik Libaresen Fran, Murad Ebrahim, i givim pinis tok promis i go long gavman olsem dispela nupela lain trabelman bai no inap brukim ol bikpela wok na miting bilong kamapim pis o belisi, em bai ol i kamapim long Kuala Lumpur, biktaun bilong Malesia long dispela wik i kam.

Taim ol lida bilong lain bilong Moro Islamik Libaresen Fran i laik toktok wantaim gavman long kamapim gutpela sindaun, dispela nupela rebel komanda i laik go hetr wantaim pait, tasol ol i nap sapotim ol dispela toktok bilong kamapim gutpela sindaun sapos gavman i givim bikpela hap bilong Mindanao Ailan i go long ol Muslim pipel long stap na lukautim.

FIJI: I laik strongim wokfren wantem Russia

GAVMAN bilong Fiji i tok em i gat laik long strongim ol wokpren wantaim Rusia.

Insait long wanpela toktok em ekting pemanen sekreteri bilong Fiji Foren Afes na Intanesenel Koporesen Ratu Tui Cavuilati, dispela plen o tingting bilong ol i stap insait long loa em i karamapim ol tingting bilong gavman em ol i kolim long 'Look North Policy'.

Fiji Live websait i ripot olsem gavman i bilip olsem ol dispela kain wokbung bai bringim ol gutpela sindaun bilong ol pipel bilong Fiji long bihain taim.

Fiji ripot tokaut long pikinini seks tred

WANPELA nupela ripot i kam long Fiji i tok ol papamama na ol wasmanmeri bilong ol pikinini, i wok long tanim baksait long pasin bilong ol yangpela i go insait long seks tred, o wok pamuk, we ol i salim bodi bilong ol long kisim mani.

Fiji Times niuspepa i ripot olsem Intanesenel Leba Ogenaisesen i tok sampela pikinini seks woka ol i bin toktok wantaim i bin tokim ol olsem, ol i save givim mani i go long ol family na helpim long peim mani bilong bas na ol samting bilong skul.

Dispela ripot i tok em i klia olsem, ol mobail telepon netwok i wok long helpim ol pikinini long passim tok wantaim ol man i laikim seks o pasin pamuk wantaim ol.

Em i tok ol samting i wok long fosim ol pikinini long salim bodi bilong ol em laik long mani, bikos ol pren na poro bilong ol tu i wokim, trabel insait long famili na bikos ol papamama i no save kea tumas long ol.

Pacific BEAT

4, 5, 6am & 4pm, 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Paitim meri mas stop

EKTING Polis Komisina Tony Wagambie i askim olgeta Provinsel Polis Komanda long lukluk insait tu long ol polisman bilong ol long kain bikpela hevi bilong bagarapim ol meri bilong ol.

Dispela i bihainim ripot long tupela polisman, wanpela long Mosbi na wanpela long Lae i bin paitim na bagarapim tru ol meri bilong ol.

I luk olsem tupela polisman ya bin mekim dispela rabis pasin long meri bilong tupela longpela taim i kam we ol arapela polisman long bareks na famili bilong ol i klia long dispela pasin. Olsem na i gutpela long Komisina i givim hatpela toktok tu long ol Polis Komanda bilong wanwan polis long noken harim na lukim tasol. Bikos dispela kain polisman i bagarapim nem bilong ol sampela guptela polisman husat i laik mekim gut wok bilong ol long sevim kantri we ol pipel long komyunuti bai rispektim ol.



Bikhet polisman olsem mas pinis long polis fos na go joinim ami bai gavman ken salim ol go long woa na pinisim laik bilong ol long kilim birua stret.

Polis Fos em bilong lukautim na strong Lo na Oda bai olgeta pipel i ken stap gut na bihainim Lo na Oda bilong kantri.

Yumi noken sutim tok tasol long tupela polisman ya long kain pasin nogut olsem bikos planti man long Papua Niugini tu save mekim olsem long ol meri bilong ol. Ol meri bilong ol save kisim pen na bagarap na stap isi wantaim long haus.

Planti man taim ol i spak na go long haus, turangu meri bilong ol save kisim kainkain toktok na planti bikpela pen long skin na bodi bilong ol. Sampela kain

belhat ol save gat o tingim long het em ol save kamautim taim bia i wok long het na bodi bilong ol.

Long moning taim bia i pinis na het bilong ol i klia, em nau ol bai sindaun isi na taim meri laik toktok na komplem long pasin em mekim long nait, wantu bai ol paitim meri gen long em noken toktok bikpela o ples klia long ol manmeri i harim. Em pasin planti man i save mekim long ol meri bilong ol.

Wanpela samting we i no klia tumas em long sait bilong loa we i tambuim man long noken paitim meri. Tru tumas meri ken kotim man na man inap go long kalabus long paitim na bagarapim meri bilong em. Tasol dispela loa i mas givim sampela sapot tu long meri na ol pikinini bilong em taim man i go long kalabus.

Ating sapos man bilong em i wokman, orait em isi long kampani bilong em o dipatmen em wok long em i ken givim pinis pei go long ol meri pikinini bai ol ken

kisim na sapotim ol wantaim.

Moabeta gavman tu mas putim sampela mani go long sait bilong was long ol dispela kain famili taim loa i holim mekimsave long papa bilong ol. Olgeta mun ol mas kisim liklik mani long Welfea opis long sapotim ol taim ol pikinini go long skul na kam long haus.

I mas gat wanpela kain welfea fan i mas kamap na stap long sapotim ol mama na famili husat i long dispela kain hevi. Bikos tru tumas man i papa bilong ol bai stap long kalabus na bos i mas pinisim ol long wok bikos ol inap stap kalabus moa long tupela o tripela krismas.

Gutpela loa bilong banisim ol meri tasol em mas gat rum tu long sapotim ol long planti yia i kam bihain bai ol pikinini ken gat kaikai na go long skul na werim bilas tu.

WANTOK KOMENTRI

Sutim tok long bia, o man i dring

DISPELA wanpela kain dring tasol i save kamapim planti birua tru long ol manmeri. Dispela samting em i bia.

Neks wik bai wanpela bikpela kibung bai kamap long glasim na paitim tok long ol birua bia o alcohol, we em i karamapim tu ol arapela strongpela dring, i kamapim insait long PNG tude.

Pasin bilong dring bia long pasin bilong dring na spak olgeta, em turangu ol yangpela bilong yumi i wok long lainim long taim ol i stap long skul yet.

Em i no samting ol i mas lainim taim ol i stap skul sumatin, tasol ol i save pinis.

Taim ol i pinisim gret 10 o gret 12, na i gat wanpela pinis kaikai long makim graduesen bilong ol, bai ol yangpela i go bung na dring bia na ol arapela strongpela dring.

Pasin bilong dring bia, em ol waitman bilong bipo i bin kirapim long taim bia i kam insait long kantri, na ol lain asples i bin orait long baim.

Nau, bia i kamap olsem planti samting, long kain kain manmeri.

Sampela i save lukim bia olsem rot bilong slekim bun na bodi bihain long wok i pinis. Ol arapela, ol i save lukim bia olsem samting bilong dring, na dring i go, inap tingting i krangi olgeta.

Taim bia i go insait long man o meri i gat belhevi, bai em i strongim tingting bilong dispela manmeri long mekim samting, we i no bihainim rot bilong gutpela sindaun insait long hauslain, famili o komyunuti.

Bia em i wanpela dring bilong ol bikpela manmeri, tasol em i mas karim asua, o manmeri husat i kamapim birua, i mas karim nem nogut?

Tude, hevi bia, em i no bilong em tasol. Nogat. Dispela nem alcohol, em i karamapim planti samting. Narapela bikpela birua bilong komyunuti, em hombru, o stim, o pain. Dispela dring, ol manmeri husat i save hait na kukim, i no save mekim wantaim stretpela stia long kukim kain strongpela dring olsem. I nogat wanpela opisal bilong helt i save stap na skelim mak bilong spak i stap insait long wan wan botol. Nogat tru.

Wankain tasol, sapos manmeri i no save long strong bilong spak i stap insait long dring ol i baim, bai ol i no inap save long mak bilong longlong, ol i ken kisim bihain long ol i dring.

I gutpela long kampani husat i mekim dispela ol kain dring long go pas long dispela kibung, bikos ol tu i mas karim sampela ol hevi bilong samting ol yet i save mekim.

Gavman i noken aipas tumas long dispela kibung, na larim ol kampani i autim tok long bisnis bilong ol.

Ol hevi bilong bia, ol strongpela dring, na hombru, em i stap ples klia pinis.

Na sapos ol pipel bilong yumi i no save long ol birua bilong dispela ol samting, gavman i mas go pas long kirapim moa wok awenes na skul tok bai pablik i save.

WANTOK

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choi

Published at
Section 58, Allotment 3
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Kamapim moa spes long ol tesimal na teknikal skul

Veronica Hatutasi i raitim

GAVMAN i mas kamapim moa spes long ol tesimal na teknikal institusen long kisim moa sumatin husat i pinisim Gret 12 long ol sekonderi na nesanel hai skul long kantri.

Prinsipel bilong Gordons Sekonderi skul long Nesanel Kapitel Distrik, Sam Lora, i wokim dispela toktok taim Wantok Nius i stori wantaim em las wik.

Em i tok gavman i wok long mekim moa spes long elementeri i go antap long sekonderi skul level, tasol nogat long ol yunivesiti, teknikal na ol arapela tesimal level skul long kantri we i lukim planti Gret 12 sumatin inap go long ol tesimal level i stap nating bikos i nogat spes.

"Ol i mas mekim i go bikpela ol tesimal level skul long kisim ol sumatin i pinisim Gret 12. Long dispela taim tu, planti ol wok developmen olsem Likwifaid Naturel Ges (LNG), maining na bilding na konstraksen bisnis i wok long kamap long siti na kantri. Olsem na gavman i mas mekim samting nau long mekim moa spes long ol tesimal institusen na teknikal skul na ol i ken trenim moa wok lain bilong mekim ol wok,"

Mista Lora i tok.

Em i tok long nau, gaman i wok long opim moa dua long elementeri, praimer na sekonderi level, tasol i no long ol tesimal na teknikal level we i gat bikpela nid long em.

Ol tisa long Gordons Sekonderi skul i bin statim wok redi long las wik Mande bipo long 2011 skul yia i stat neks wik.

Mista Lora i tok skul i gat 44 tisa we 18-pela em ol meri tisa. Skul i gat moa long 1,000 sumatin i wokim Gret 9, 10 na 11.

Em i tok olgeta tisa we i gat pemanen posting long skul i stat wok pinis, tasol ol i wetim yet 9-pela tisa i bin aplai long go insait bilong kisim ples bilong 9-pela tisa husat i bin lusim skul long pinis bilong skul las yia.

Mista Lora i tok ol i bin etvataisim ol dispela posisen na ol tisa bilong ol narapela provins i bin aplai, tasol ol i no kamap yet long skul.

Mista Lora i tok Gordons Sekonderi i redi tasol long skul yia i stat neks wik.

Namel long ol ripot yumi ritim long nius, harim long redio olsem planti tisa na moa yet, ol disp-ela i stap long LNG projek provins, i laikim bai Edukesen Dipatmen i apim pe, Mista Lora i tok yumi noken ting



MEKIM MOA SPES: Ol tisa long Gordons Sekonderi skul long Mosbi i sekim nem lis bilong ol long tis long dispela yia. Foto: Nicky Bernard

olsem dispela em i liklik samting, nogat.

"Ol pipel na komyuniti i autim wari bilong ol long dispela samting na i moabeta long gavman na ol atoriti i lukluk long ol dispela wari bikos yumi mas tingim skul bilong ol pikinini.

"Long wankain taim tu, mi laik mekim toktok i go long ol tisa olsem sapos em i laik bilong yu long kamap tisa, mekim gut wok long skulim ol pikinini. Na long Gordons Sekonderi, skul wok bilong dispela yia i stat nau," Mista Lora i tok.

Sampela skul gat fi dinau bilong las yia stap yet

Veronica Hatutasi i raitim

DINAU ol papamama i gat long ol skul long kantri em i wanpela bikpela hevi ol skul i bungim olgeta yia na dispela i save sotim ol skul long karimaut gut ol wok na operesen bilong ol inap long pinis bilong skul yia.

Taim 2011 skul yia i laik stat, sampela papama bilong Gordons Sekonderi skul insait long Nesanel Kapitel Distrik, i gat moa long K50,000 skul fi dinau yet ol i no peim yet long skul, Prinsipel Sam Lora i tok.

Wok bilong putim pikinini i go long skul em i bilong papamama tasol gavman i save helpim wantaim skul sabsidi. Olsem na em i wok bilong papamama long painim, bungim, sevim na redim inap skul insait long ol de na mun long wanpela yia na taim skul i stat, ol bai no inap sotwin na tok ol i nogat mani long peim skul long ol pikinini bilong ol.

"Mipela i toksave long ol papamama long maus na salim tu ol wan wan pas i go long ol long baim ol skul fi dinau, tasol sampela i no save wokim samting long stretim dispela.

Em i tok taim skul i laik painim ol rot long mekim ol papamama i baim ol skul fi dinau o long stat bilong skul yia taim papamama i no peim wanpela skul fi na pikinini i laik go insait long skul, ol skul i save kisim ol toksave long Edukesen Dipatmen long noken rausim ol pikinini, tasol kisim olgeta pikinini i go long skul, maski ol i no wokim wanpela skul fi peimen yet.

"Yumi save olsem pikinini i gat rait long go long skul, tasol long dispela keis, husat i bagarapim dispela rait-papamama o tisa? Bai

WOK REDI: Ol tisa bilong Gordons Sekonderi skul i mekim ol wok redi long statim 2011 skul yia neks wik Mande. Foto: Nicky Bernard



yumi mekim wanem?" Mista Lora i tok.

Em i tok sampela rot we ol skul i save bihainim long traime mekim ol papamama i peim ol skul fi dinau em long putim dispela dinau antap long skul fi bilong nupela skul yia na papamama i mas baim. Dispela em long ol sumatin husat i skruim yet edukesen bilong ol long dispela skul. O long ol dispela i go aut, holim ol Gret 10 o 12 setifiket bilong ol sumatin inap ol i pinisim olgeta skul fi na ol i ken kisim ol setifiket bilong ol.

Mista Lora i tok prais bilong ol samting bilong ol tisa na sumatin i yusim long skul, ol samting bilong stretim o bildim ol klasrum na ol haus tisa, wara, lait na telepon bil i go antap, tasol skul fi mak i stap wankain. Na skul fi sabsidi mak ol wan wan skul i save kisim i wok long go daun.

"Olsem na pasin we sampela papamama i mekim long i no baim skul fi long ol pikinini bilong ol em i wanpela bikpela hevi ol skul i gat long em, tasol i nogat wanpela rot yet i stap we i mekim ol papamama i ken baim ol skul fi," Mista Lora i tok.

Tasol em i tok tru dispela wari na hevi i stap, ol skul na ol tisa i mekim ol wok bilong ol long skulim ol pikinini bikos ol yet i bin laikim long kamap ol tisa.

DON'T FORGET THE GOLDEN RULE!

WHEN ITS... BACK TO SCHOOL

ITS ALWAYS... BACK TO THEODDIST!

Shop at Theodist, They have everything You need for School in one place!



REJISTRESEN TAIM: Sampela papamama na ol sumatin i sekim nem na givim peimen bilong skul fi risit long wokmeri bilong Gordons skul. Foto: Nicky Bernard

VISIT OR CALL US TODAY!

Waigani Drive, Port Moresby
Milfordhaven Road, Lae City

Ph: 325 6500
Ph: 475 5488

Fax: 325 0302
Fax: 472 7838

Email: sales@theodist.com.pg
Email: saleslae@theodist.com.pg

THEODIST LTD
THE STATIONERY SUPERMARKET

GLOBE

CORNER BEEF

More Easy
More Tasty
More Energy



GLOBE....the perfect choice

Ol skul fi mak bilong dispela yia 2011

NESENEL Edukesin Dipatmen i tokaut pinis olsem bai nogat bikpela senis i kamap long skul fi bilong dispela yia 2011.

Nesanel Edukesen long las yia, i bin wokim disisen bihainim wampela wok painimaut i soim ol hevi ol papamama i bungim long sot long mani bikos pe bilong ol samting i go antap na mani ol i kisim i no inap. Na hevi i bikpela moa long ol lain i stap long ol ruel eria bikos long planti hap, ol i no kisim ol gavman sevis. Tu, komyuniti i gat hevi, planti komitmen tumas na ol dispela i kamapim hevi long ol famili na seving na olsem, ol bungim hevi long peim skul fi long ol pikinini bilong ol.

Olsem na skul fi mak we ol skul i lukim na makim ol skul fi mak bilong ol i go olsem long ol Praimeri, Vokesenel, Sekonderi/NHS na FODE:

Praimeri long Gret 3-6 : K230 Gret 7-8: K230

Sekonderi /Vokesenel Gret 7-8 long ol sumatin i slip long skul : K1,100.00 na K750 long sumatin i slip long ples na go long skul.

Sekonderi/Vokesenel level em K800 long ol Gret 11-12 sumatin i slip long ples na go skul taim ol

boda o lain i slip long skul long i peim K1,300.00.

Skul fi mak bilong ol Praimeri Tisas Kolis na PNG Edukesen Institut o PNGEI fi em Opis bilong Haia Edukesen (OHE) i makim long en.

Ol Diploma long Tising (Praimeri) sumatin we HECAS i sponsaim i peim K1,257.00.

Diploma long Vokesenel na Edukesen na Trening (DOVET) sumatin i slip long skul (Boda) na i peim skul fi em yet (Self Sponsa) em bai peim K4,500.00. Ol de sumatin bai peim K2,635.00.

Ol Teknikel na Bisnis Kolis sumatin bai peim ol skul fi mak olsem:

Long sindaun long 22 wik Diploma Teknisen kos, skul fi em K2,180.00.

Long 44 wik kos, skul fi mak em K4, 600.00 we ol PETT/TTC Diploma kos ol self sponsa na HECAS sponsa sumatin wantaim i peim.

Long sindaun long 10-pela wik Bridging Kos, skul fi em K1,170.00.

Long ol aprentis i go long skruim kos long 8-pela wik, fi em K1,050.00

Long ol pat taim na spesel kos, ol

i no tokaut long fi tasol hamas wok i stap insait long dispela kos bai makim mak bilong skul fi.

Toksave tu olsem ol kolis bai sasim K300.00 etministretiv fi long ol 44 wik kos.

Ol dispela ol skul fi mak we Nesanel Edukesen Bot (NRB) i sasim i bilong givim stia long ol Provinsel Edukesen atoriti na ol Edukesen Divisen bilong putim ol skul fi mak we ol papamama inap long peim na long wankain taim, lukim olsem dispela manimak bai helpim skul i ron mekim wok inap long pinis bilong skul yia.

Olsem toksave i save gon aut olgeta yia long ol edukesen atoriti, em i wok bilong ol papamama na ol gadien wantaim ol skul gavaning bodi, ol edukesen ejensi, provinsel na nesanel gavman long serim kos bilong edukesen bilong ol pikinini. Na ol papamama i mas sevim mani nau na kam stat bilong skul yia 2011, ol bai gat inap mani.

Stat yet long las yia, ol elementeri skul level i nogat skul fi, tasol ol i go long skul fri.

Edukesen Dipatmen i mekim olsem long inapim gol bilong Yuni-vesel Besik Edukesen we PNG i mas inapim kam yia 2015.

Redim ol Tisa Risamsen Fom bipo Februeri 28

...Sapos nogat, bai nogat pe

Veronica Hatutasi i raitim

SAPOS Waigani Edukesen het opis long Fincorp Haus i no kisim ol fom bilong ol tisa long ol Provinsel Edukesen opis long statim wok long dispela skul yia bipo long Februeri 28, ol bai rausim nem bilong ol tisa long peirol.

Sekreteri bilong Edukesin, Dokta Joseph Pagelio i tokaut long dispela.

Dokta Pagelio i tok olsem taim em i salim toksave i go aut long ol tisa i stap aninit long nesanel edukesen sistem olsem ol i mas go long ol wanwan skul ol i putim ol long en na stat wok long dispela wik Mande, Janueri 31, bipo 2011 skul yia i stat long neks wik Mande Februeri 7.

Dokta Pagelio i tok aninit long loa, ol tisa i mas pulumapim Risamsen bilong Duti Samari Sit (RoDSS) long namba wan de ol i stat wok long skul.

"Dispela em bikpela samting bikos em bai soim olsem tisa i kisim wok long hap we Nesanel Edukesen Bot o Provinsel edukesen Bot i makim na putim em long en.

"Long wankain taim tu, pulumapim RoDSS bai soim wok skruim long pe bilong tisa, stat yet long las yia. Olsem na em i bikpela samting long ol tisa i pulumapim fom gut," Dokta Pagelio i tok.

Em i skruim tok i go moa olsem narapela bikpela samting em, Prinsipol, Het Tisa, Menesa na Sinia Tisa i stap long namba wan de ol tisa i stat wok na sekim ol fom na lukim olsem ol tisa i pulumapim ol gut na sainim. Bihain long dispela, Prinsipol i mas salim ol fom i go long Provinsel Edukesen Opis long ol tisa long ol provinsel skul, na ol Asisten Sekreteri long Fincorp Haus long ol tisa long ol nesanel institusen na salim i go long Peirol na ol narapela sevis brens long wok long ol.

Dokta Pagelio i tok sapos Waigani i no kisim ol Risamsen Fom bilong ol tisa, na abrusim Februeri 28, ol bai kisim laspela pe bilong ol long Pe namba 5 o Peide long Mas 11, 2011. Na ol bai saspensim o stopim pe olgeta long Peide namba 6 long Mas 25,2011.

Long wankain taim, ol tisa insait long Nesanel Kapitel Distrik (NCD) i bin statim skul wok wok bilong ol long dispela wik Mande, Janueri 31, 2011, olsem tasol ol narapela skul tisa long kantri.

Long dispela taim, i gat moa long 46,000 skul tisa insait long PNG husat i mekim wok long Elementeri level i go long Praimeri, Hai skul, Sekonderi, Vokesenel na Teknikel level

Asisten Edukesen Sekreteri bilong ol NCD skul, Tau Nauna i tok ol tisa long ol NCD skul i bin staim wok bilong ol tasol em i no inap givim yet ripot bikos ol opisa bilong em i bungim yet ol ripot i stap.

"Ol opisa i wok long raun i go long ol skul long sekim ol tisa na hamas i stat wok pinis. Ful ripot long dispela bai redi long tumora, Fraide," Mista Nauna i tok.

Mista Nauna i tok ol tisa insait long NCD i nogat wari o hevi long sait bilong balus tiket na kam bek long statim wok long ol wan wan skul bilong ol bikos opis i bin stretim ol wantaim balus tiket long las yia yet bipo long Disemba 31.

Em i tok olgeta tisa i wok long 18-pela mun pinis long skul em i tisa long em inap long kisim balus tiket. Na stat yet long taim NCD Edukesen divisen i wokim disisen long olgeta tisa i sapos long kisim balus tiket i mas putim aplikesen fom long balus tiket bilong ol na ol famili bilong ol long mun Epril long wan wan yia, ol i no bungim hevi nau.




Malolo bihain long namba wan de skul

Ol sumatin bilong Yako klostu long Vanimo i sindaun kaikai bihain long skul. Foto: James Kila

Aitape Wes sab-besin oil na ges nidim K3.7 milien helpim long gavman

James Kila i raitim

ASKIM: Siaman bilong Aitape Wes sab besin oil na ges projek, John McRobin i soim ol projek pepa na rejistresin i kam long IPA. Foto: James Kila



OL PAPAGRAUN insait long Aitape-Wes sab besin long Wes Sepik provins i mekim bikpela askim i go long gavman long helpim ol wantaim K3.7 milien long pinisim oil na ges developmen program insait long eria bilong ol.

Ol papagraun ya bilong petroleum prospecting laisens 320 (PPL) eria na PPL 306 i redi long kamapim wok developmen tasol ol i nidim helpim long gavman long karimaut sampela mobailaisisin wok.

Siaman bilong Aitape Wes Sab-Besin oil na ges developmen projek, John McRobin, i tokaut olsem taim gavman i bin kamapim tupela bikpela dokiumen o pepa em, Nesenel Kontent Plen na PNG Visin 2050 em i tok

olsem papagraun bai stap insait long risos developmen wok long kantri.

Olsem na ol papagraun bilong Aitape Wes Sab Besin yet i hatwok tru na i peim mani long kamapim sivil rejistresin na len mobailaisisin taim ol i bringim ol wokman bilong

Dipatmen bilong Lens na Hom Afes long karimaut sivil rejistresin na tu lain long UPNG long helpim ol.

Ol papagraun i kisim setifiket pinis long Invesmen Promosen Atoriti (IPA) long rejestresin bilong kampani bilong ol em Aitape Intergrated Devel-

opment Limited on Oktoba 12, 2010. Tasol sampela moa bikpela wok i stap yet.

Mista McRobin i tok tu olsem em i go pas long ol lain papagraun bilong Aitape Wes sab besin long Jun 14, 2010 na stat long dispela taim i kam nau ol i redim o ogenaisim ol yet gut tru long kisim helpim i kam long ol dipatmen bilong gavman.

Em i tok ol i salim 32-pela submisen pinis long traime kisim helpim, tasol bekim i no kam na ol papagraun i no amamas tumas.

Sampela papagraun i bin go long Mosbi long 2008 tasol ol i no kisim wanpela helpim i kam long lokal MP o ol lain bilong Aitape husat i stap long Mosbi siti.

Mista McRobin i tok bihain long 26-pela mun olgeta em i sore na i baim tiket bilong tupela lida bi-

long ol lain papagraun em Gerald Alec wantaim nara-pela long salim ol i go bek long Aitape.

"Mipela i yusim samting olsem K10,000 long peim ol IPA rejistresin, na mipela i peim K3,000 long kamapim Aitape oil na ges konsep plen na tu ol nara-pela wok mipela mi mekim we total mani em K29,000," Mista McRobin i tok.

Moa long en tu ol papagraun yet i bin yusim mani bilong ol yet olsem mekim sampela wok na nau ol i askim gavman wantaim na Dipatmen bilong Petroleum na Eneji, Nesenel Plening na Monitoring na Fainens na Treseri long helpim ol.

Tasol, Mista McRobin i tok ol lain long Aitape-wes oil na ges i kamap pinis wantaim namba wan tingting long mekim sabmisisen we i no go wantaim

Oil na Ges Ekt tasol i bihainim Nesenel Kontent Plen we i lukim ol nesenels o papagraun i wok insait long redim ol projek wok.

Em i tok bihain long dispela ol i bin mekim olgeta sabmisisen i go long olgeta ofis bilong gavman long kantri stat long distrik level i go long Ofis bilong Prait Minista.

Mista McRobin i tok em yet wantaim ol lain papagraun i putim bikpela mani bilong ol yet long karimaut ol wok olsem sosel meping, stadi bilong bus, graun (environmental impact study) we ol i yusim ol lain bilong Yunivesiti bilong PNG (UPNG) long helpim.

Tasol sampela moa bikpela wok i stap yet long sait bilong sivil rejistresin, ILG rejistresin, IPA rejistresin na midia edvataisimen.



NEW ZEALAND HIGH COMMISSION

PORT MORESBY

TE AKA AORERE

KIA ORA AND GREETINGS TO ALL NEW ZEALANDERS ON WAITANGI DAY

As we celebrate Waitangi Day we'd like to remind you of the benefits of registering your details with the NZ High Commission, Port Moresby.

As New Zealanders living or travelling overseas, you never know when you may need to seek help or information from the High Commission. By registering with us, you will help us find you in an emergency, so we can check on your well-being or send you important information.

The High Commission also receives a number of urgent requests each year from family in NZ seeking the whereabouts of relatives in PNG.

Registration is simple and confidential. Visit www.safetravel.govt.nz. All we need to know is the names of family members, location and contact details and the period of your stay in PNG.

www.safetravel.govt.nz is also the official source of advice for New Zealanders travelling or living overseas.

Contact: The Consular Officer, New Zealand High Commission
Tel. 325 9444 Fax: 325 0285 email: nzhcpom@dg.com.pg



Kiwi Alumni Network

Did you study in New Zealand?

Haere mai! So did we!

The Kiwi Alumni Network extends a warm invitation to all Papua New Guineans who have undertaken studies in New Zealand to join them. NZ alumni across PNG are enjoying success in all sectors of the economy and government. The aim of the Kiwi Alumni Network (formerly known as the PNG-NZ Alumni Network) is to maintain a New Zealand contribution to that success, by helping alumni to:

- Network socially and professionally with other alumni who recognise the value of a NZ education;
- Maintain links with the New Zealand High Commission;
- Receive New Zealand news and developments.

All those who have studied at any level in New Zealand are warmly welcomed.

Registration is free.

The Kiwi Alumni Network, NZ High Commission
Tel: 325 9444 Fax: 325 0565 Email: nzhcpom@dg.com.pg

TORO



BIABIA



KANAGE



TOKWIN

Lukaut long ol bikman wantaim gan

Dispela birua las wiken long Mosbi we i lukim biknem ragbi pilaia i dai taim wanpela bikman i sutim em wantaim gan i kamapim pret pinis long planti liklik man. Sampela bikman blong gavman na bisnis save karim gan na pistol raun na ol i ken bagarapim husat arapela lain wantaim ol dispela samting taim ol belhat. Yumi ol liklik manmeri mas lukautim gut nau.

Ren pundaun na bikpela san long PNG

Insait long sampela hap bilong PNG

i lukim bikpela ren i pundaun na ol bikpela wara i solap na tait na kamapim hevi. Tasol sampela ples olsem Bogenvil na Nu Ailan provins i lukim bikpela san stret na ol pipel i painim hevi long kisim wara. Klaimet tenis i soim kala bilong en pinis. Ol lain sol long Buka na Niu Ailan tok 'Wara we, wara we?' na sampela hap i tok "San we, san?"

Tisa na gavman wokman go long LNG

Sampela ol tisa na ol gavman wokman long Sauten Hailans na tu sampela hap long PNG i lusim wok na go traim sans wok long LNG projek long Sauten Hailans. Ol i tok pei i gutpela na ol les long westim taim

Lae pulap long stilman na raskol

Lae i no moa luk olsem wanpela siti. Em luk olsem bik taun bilong raskol na setelmen manmeri stret. Ol bas stop olsem Eriku na mein maket save pulap tru long ol stilman bilong Hailans i sanap na lukluk long suvim han long bilum bilong ol mama na pulim samting bilong ol manmeri husat i laik kalap long bas. Moabeta ol dispela grup bilong Hailans mas go bek long ples bilong ol. Em sem pasin tru.

Tokwin Tasol...

Grid of letters for a word search puzzle.

Painim ol dispela toktok bilong 'Baim PNG Tasol':

- COCA COLA, BISKET, SISPOP, TINPIS, NUDELS, BESTA, KWIRTAIM, PNG MADE, OX & PALM, OCEAN BLUE, KODAK, FANTA, SPRITE, SCHWEPPEES, GOLDEN CRUSH, NATURE'S OWN, ORCHY, CHEEZELS, SUN UP, PARADISE

Grid for a 6x6 Ansa bilong las wik Sudoku puzzle.

Grid for a 9x9 Ansa bilong las wik Sudoku puzzle.

Ansa bilong las wik Sudoku

Grid for a crossword puzzle (Ansa bilong las wik Pasol).

Ansa bilong las wik Pasol

EMTV Television Guide

Table with columns for time, channel, program name, and description. Includes sections for 'MANDE, FEBRUERI 14 2010', 'TUNDE, FEBRUERI 15 2010', and 'TRINDE, FEBRUERI 16 2010'.

Ol Progam na Taim i ken senis...

Raun wantaim Kanage olgeta wik

Elvis o samting?

Paps Kanage em wanpela man bilong painim meri. Wanpela taim Paps Kanage i sindaun na gris wantaim ol yangpela mangi istap. Ol i stori i go na Kanage tokim ol mangi, "Las taim mi go long Boroi, insait long Madang, mipela i bin i go stretim wanpela hevi. Man, mi stretim hevi bilong meri ya i go bik moning na mi kisim bikipela taim stret". Paps Kanage lusim ol mangi na em wokabout i go long haus. Long rot em bungim wanpela mama na mama ya tokim em, "Kanage, sampela toktok bilong yu i stap wantaim mi. Wanpela meri i salim i kam". Kanage hetwin na tok, "Aiy-oooo! Maski mi wanem kain man olsem ya. Yupela kisim naip na katim nek bilong mi na bai mi dai. Taim mi dai, bai olgeta pren meri bilong mi long olgeta ples bai bung na krai long mi!"

TDS Tor
Angoram



Yu tasol dispela kaukau ya!

KANAGE em bilong Hailans na em man bilong kaikai kaukau wantaim gris pik. Wanpela taim em i pilim les long kaikai kaukau na i go raun long Ostrelia (Australia) long kaikai sampela kaikai bilong ol waitman. Ol wantok bilong em pikim em long ples balus na kisim em i go long haus. Narapela anti ya pairap long haus kuk i stap. Kanage pasim tingting tasol na daunim spet. Kaikai redi na ol i go insait long kaikai. Kaikai smel nais tru na anti ya karamapim ol pot. Ol prei pinis na ol sindaun rere long kaikai. Taim ol i opim ol pot, wanpela pot em kaukau tasol. Anti ya tokim Kanage, "Yu mas misim kaikai bilong ples stret ya!" Kanage isi

kisim kaikai bilong em na sindaun. Em lukim kaukau na tok, "Baset, yu dispela kaukau ya mi lusim long ples i kam long hia na yu painim mi yet!". Kanage kaikai ol arapela kaikai na lusim kaukau i stap.

Alexius S
Kimbe

Ol skwat!

Salim ol gutpela Kanage

tok pilai i kam long:

Kanage Tok Pilai

P.O. Box 1982,

Boroko, NCD

Port Moresby.

Email: atolire@wantok.com.pg



NEM: Ludwig Hesai

KRISMAS: 21 (man)

ADRES: Kilipau village, P.O. Box 96, Vanimo, Sandaun Provins

SAVE LAIKIM: Senisim Presen, pilai soka, harim musik na raitim pas.

NEM: Benjamin A. Wep

KRISMAS: 20 (man)

ADRES: Kilipau Village, P.O. Box 96, Vanimo, Sandaun Provins

SAVE LAIKIM: Pilai soka, voli bol, senisim presen na painim wanpela meri long maritim.

NEM: Patrick Gisiye

KRISMAS: 20 (man)

ADRES: New Century Wholesale, P.O.Box 218, Kiunga Western Provins

SAVE LAIKIM: Pilai soka, mekim pren, raitim pas, go lotu na senisim presen.

NEM: Benuel Kapamai

KRISMAS: 18 (man)

ADRES: P.O. Box 2901, Lae

SAVE LAIKIM: Pilai soka, volibol, pilai gita, harim musik, ritim buk na go lotu

NEM: Bainy Wou

KRISMAS: 20 (man)

ADRES: Kilipau Village, PO Box 96, Vanimo Sandaun Provins

SAVE LAIKIM: Raitim pas, senisim presen, pilai soka, volibol na painim wanpela meri long maritim.

NEM: Benny Wagu

KRISMAS: 18 (man)

ADRES: Kilipau Village, P.O.Box 96 Vanimo Sandaun Provins

SAVE LAIKIM: Senisim presen, raitim pas, pilai soka, volibol na harim musik

NEM: Terence Mathew

KRISMAS: 16 (man)

ADRES: Ohu Primary School, PO Box 169, Madang511, Madang Provins

SAVE LAIKIM: Go skul, harim musik, go Lotu, raitim pas na mekim pren

NEM: Tenny Paul

KRISMAS: 19 (man)

ADRES: Komabea Primary school, PO Box 220, Kerema, Gulf Provins

SAVE LAIKIM: Pilai spot olsem volibol, soka na basketbol, harim musik, ritim niuspepa na wok

NEM: Jamie Awe

KRISMAS: 29 (man)

ADRES: C/Hargy Oil Palms, PO Box 21 Biiala, West New Britain Provins

SAVE LAIKIM: Lukim rugbi, mekim poroman wantaim ol arapela na painim wanpela lotu meri bilong maritim

NEM: Atasing Bafike

KRISMAS: 27 (man)

ADRES: Bumbum Primary School, PO Box 4588, Morobe Provins

SAVE LAIKIM: Harim musik, pilai soka, watsim TV na pilai kompyuta gem

Ol entaitelmen bilong man bilong mi

Dia Laiplain,

Mi NA man bilong mi i bin marit long 30 krismas, tasol long las ya man bilong mi i bin dai. Mi wanpela wido nau na mi nogat pikinini bilong mi yet husat inap helpim mi long ol samting mi laik wokim long en.

Man bilong mi nau i dai i bilong narapela provins na mi tu i bilong narapela provins. Ol famili bilong man bilong mi i no amamas na ol i kros long mi bikos mi nogat pikinini na ol narapela samting moa. Mitupela man bilong mi i bin marit aninit long loa na em bin wanpela sinia pablik sevan.

Mi painim hat long klia watpo ol lain famili bilong man bilong mi i wok long stopim mi long kisim ol entaitelmen o mani bilong man bilong mi bikos ol i tok mi no bin karim pikinini long em na olsem, mi mas noken kisim ol entaitelmen bilong em.

Mi painim hat na bai mi mekim wanem?

WIDOW IN DISTRESS

Pren

Mipela i sori long ritim stori bilong yu. Mipela i luksave olsem em no gutpela long ol lain i stap klostu long yu i wokim ol dispela samting long yu. Laik pasin we i bin bungim na pasim yu na man bilong yu i dai nau em wankain laik pasin ya i bin opim dua long haus bilong yu. Mipela i bilip olsem yu bin mekim gut long ol lain famili bilong man bilong yu taim em i stap laip. Mipela i sori olsem nau ol tambu bilong yu i no inap mekim gut long yu olsem yu bin mekim long ol.

Bikos yu no bin gat pikinini long man bilong yu, ol tambu bilong yu i no wanbel long yu kisim ol entaitelmen



mani bilong em, tasol mipela i ting olsem i gat rum long toktok na painim ol ansa long hevi na wari yupela i gat long en.

Pren, i moabeta olsem yu na ol tambu bilong yu i luksave olsem laik pasin i save pulim man na meri wantaim long marit na stap wantaim. Dispela kain poroman i save gro long eria bilong sering na lukautim gut wanpela arapela long gutpela taim na long taim nogut inap dai i painim wanpela. Mipela i bilip olsem as bilong marit em long strongpela laik, luksave na rispek na maski yupela i ken stap gut wantaim ol pikinini na tu, taim yupela i nogat pikinini.

Ol mani samting man bilong yu i lusim taim em i dai i bilong yu na i moabeta yu sekim bikos sapos samting ol tambu bilong yu i wokim i no fea na i no stret. i moabeta yu sekim wantaim ol atoriti i save moa long dispela samting long helpim yu kisim ol entaitelmen mani. Pren, i moabeta yu go long opis we man bilong yu i bin wok long em na tokim ol long wari yu gat long en. Long wankain taim, i moabeta yu go long Leba Dipatmen long givim yu ol stiatok long dispela samting.

Pren, samting yu bungim em mipela i luksave long en na plnati ol narapela famili tu i bungim long en. Tasol yumi mas stretim gut ol dispela kain samting.

Yumi luksave olsem sampela samting i save kamap taim ol lain yumi laikim i no moa stap wantaim yumi. i

moabeta yu no wokim samting long kamapim moa hevi tasol wok wantaim ol tambu bilong yu long kamap wantaim solusen o ansa bai yupela wantaim i wanbel long en.

I moabeta yu no lukim dispela wari long entaitelmen long dai man bilong yu olsem samting bai kamapim hevi, tasol olsem sans long yu na ol tambu bilong yu i stretim wok pren namel long yupela. Ating taim yupela i toktok wantaim, ol tambu bilong yu i ken lukim olsem samting ol i mekim i no stret. Ating long pasin kastom bilong yumi, ol i lukim olsem em i orait, tasol long ligel marti we yupela i marit bihainim lo, i gat lo i stap bilong lukautim yu, maski yu gat o i nogat pikinini.

Pren, mipela i amamas long yu long sanap strong na yu laikim pasin jastis i kamap. Mipela i strongim yu long pretim God na i no man bikos man bai feilim yu tasol wantaim God, em bai nogat. Ritim Buk bilong Matyu, Sapta 10 na Ves26-28.

I moabeta yu go lukim Opis bilong Kureta long kisim moa toktok na stiatok long ol mani samting man bilong yu i dai na lusim.

God i ken givim yu gutpela stia na strong.

Pren bilong yu, Laiplain
Laiplain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laiplain

Kutubu meri lonsim rais masin

OL MERI long Kutubu, Sauten Hailans Provins i gat olgeta as bilong lap bikos ol na famili bilong ol bai gat kaikai.

Namba wan kaikai bilong Papua Niugini em rais.

Ol i lap bikos ol i ken planim na lukautim rais. Tasol moa yet long wanem ol i gat masin bilong rausim skin bilong rais, kisim, kukim na kaikai rais stret.

Dispela amamas i kamap bihain long ol meri i lonsim masin bilong rausim skin bilong rais long Pimaga gavman stesen long klostu long pinis bilong las yia.

Lonsing i lukim 2000 rais fama, planti em ol meri i kam long Foe, Faso na Moran i kamap long lukim de.

Oil Search Limited, wanpela risos developa long ges na wel risoses long Sauten Hailans Provins i kamap na lonsim wok bilong tupela masin.

Laik bilong ol manmeri long kamapim rais bilong ol yet i kamap bikpela we dispela i lukim ol meri long Kutubu i kamapim Kutubu Foe Wimen's Asosiesen (KFWA).

Wantaim dispela ol i kisim 20

kilogram rais sid long Nesanel Agrikalsa Risets Institut (NARI) long planim rais.

KFWA i kisim helpim long PNG Wimen long Agrikalsa Dvelopmen Faudesen (PNGDIADF) we i kamap long 2008 long Lae, Morobe Provins.

Bihainim dispela laik bilong ol rais fama i stat long kamap bikpela na dispela i lukim kamap bilong KFWA.

Wantaim KFWA i gat Namoi Namoi Wimen's Asosiesen (Faso) na Moran Wimen's Asosiesen.

Ol meri i planim rais tasol hevi long ol i no inap long kaikai rais na strongim ol yet em bikos ol i nogat masin bilong rausim skin inap long ol i kisim tupela na lonsim wok bilong ol long las wik.

Aninit long PNGDIADF, Dipatmen bilong Agrikalsa na Laipstok (DAL) i givim bikpela Satake rais mil masin we kos bilong em i stap olsem K30,000 i go long K40,000. Wantaim dispela em narapela masin we kos bilong em i stap olsem K7000 em Oil Search i Limited i givim.

Long taim bilong lonsing KFWA presiden Naomi Samuel i tok sak-



STRONGIM LAIP: Kutubu meri kisim masin long mekim rais.

sak we i save kisim 15 i go long 20 yia long gro i bin kaikai bilong ol long olgeta dispela taim.

Tasol wantaim kamap bilong rais na masin bilong ol dispel bai

helpim gut ol famili long ol kain kaikai ol bai kisim.

Long skruim tok bilong em PNGDIADF presiden, MariaLinibi, i tok tenk yu long ol meri Foe na

amamas long helpim em Oil Search, Komyuniti Dvelopmen Inisitiv (CDI), NARI na DAL long givim sapot.

Marengo kamapim moa dril wok kamap long Yandera diposit

INTANESANAL kopa developmen kampani, Marengo Maining Limited, i amamas long toksave long daimon drilling em i mekim long Yandera kopa molibdenum gol projek we em i papa long em.

Ol traim Marengo i kamapim long save long dispoit bilong mineral i stap long dispela hap i soim i gat planti mak bilong kopa na gol.

Mak bilong namba wan hap bilong dispela ol traim wok long 984 mita i go daun aninit long graun i soim i gat kopa, molibdenum na gol i stap long Imbruminda jon, notwesten insait long Yandera Sentral Porpiri sistem.

Namba tu dril (YD294) we i kamap long dispela taim i kamap long Gremi jon, dispela i stap long sautis bilong Imbruminda. Dispela hap i soim i gat deposit bilong planti minarol.

Marengo i hop olsem wantaim dispela dril progrem sampela bilong dispela wok bai go insait long painim moa ol hap we i gat minarol.

Kamap bilong dispela ripot inapim Difinitiv Fisibiliti Stadi (DFI) we kampani bai tokaut

long namel bilong dispela yia.

Kampani i redi tu long kamapim sampela dril wok long notwe bilong kampani.

I gat namba tu dril wok em kampani i mekim long Gremi Jon na dispela bai kisim olsem 1000 mita.

Amamas long kamap bilong dispela wok menesing dairekta bilong Marengo Les Emery i tok: "Kain ol wok i gat bikpela mining long wok kamap bilong Yandera Main na stap bilong Marengo."

"Mak bilong dip drilling i soim olsem i gat bikpela namba bilong diposit i stap long dispela hap."

"Kain wok i strongim bilip long mipela yet na long ol investa husat i redi long putim mani na developim projek."

"Kamap bilong dispela projek bai soim olsem kopa na molibdenum projek i wanpela bikpela projek long Esia Pasifik rijen.

"Wantaim dispela mipela i lukluk go het long skruim dispela ol wok bilong mipela," Mista Emery i tok

Praivet sekta strongim manmeri: Polye

MINISTA bilong Foren Afeas na Tred na Memba bilong Kandep, Don Polye, i tok strong long kamap bilong wokbung namel long pablik praivet patnasip progrem.

Em i tok kamap bilong dispela progrem bai helpim gut ol manmeri.

Em i mekim dispela tok

long taim Nick Roniotis, Menesing Dairekta bilong Moss Kapitel Pasifik i givim em Masta Plen bilong dispela progrem.

Em i tok kamap bilong wok bisnis i stap long strong bilong kain progrem olsem.

Em i tok dispela planti ol wok i sut i go long lukim

Visen 2050 i karim kaikai long 40 yia bihain taim na kamap bilong dispela progrem i moa gutpela long strongim ol wok.

Moss Kapitel i stap olsem edvaisa bilong PPP progrem.

Mista Polye i tok rot bilong kamapim strong bilong ol

Papua Niguini manmeri i stap long han bilong kamap bilong gutpela progrem na PPP i wanpela bilong dispela progrem.

"Bikpela as tingting em long lukim ol manmeri i kamap na soim strong bilong ol long strongim ol yet na developim kantri," Polye i tok.

ANZ skruim invesmen long Pasifik rijen

ANZ i skruim invesmen long Pasifik long 2011 mani yia wantaim lukluk long kamap bilong moa opis bilong em.

Long taim em i tokaut tu long mani mak em i kamap long long 2010.

Mani bilong em long 2010 bihain long em i baim takis i sanap olsem US\$132 milion long wok bisnis long Pasifik rijen.

CEO Pasifik Michael Rowland i tok: "Invesmen bilong mipela long rijen i soim laik mipela i gat long kamapim na strongim wok bilong rijen.

"Benk i mekim wok long 12-pela kantri long rijen

"Long 2010 wok bilong mipela i skruim tu stretim wok em mipela i mekim long Lae na Mt Hagen opis.

"Mipela i kamapim opis tu long Gizo, Solomon Ailans na bai opim nupela brens long Suva, Fiji long pinis dispela yia."

Long mani ripot bilong em



KAMAPIM WOK: ANZ Benk long Habu Siti, Konedobu. Poto: FAIL

long 2012, ANZ i lonsim eGate, long winim ples na kamapim ilektronik pe. Ol kastoma i ken mekim benking long online sevis.

Dispela sevis i kamapim bihanim planti ol elektronim sevis.

Long Papua Niugini e mi kamapim sampela bilong

dispela ol sevis long bungim laik bilong PNG Likufaid Nuturel Ges (PNG LNG) projek.

Benk i strongim gen ol sevis bilong em bihain long bagarap em sunami i kamapim long Samoa, Amerika Samoa na Tonga na saiklon long Fiji na Cook Ailans.

"Wantaim moa long 2,000 lokol wokmanmeri insait long Pasifik rijen, mipela i save long bikpela mak bilong sapotim komyuniti.

"Mipela i tok welkam long lonsing bilong lokol Pasifik wokmanmeri em mipela i gat long em.

"Long 2010 mipela i lonsim Pasifik Lidasip Dvelopmen program.

"Mipela i lukim pinsi kaikai bilong kain program olsem long Isikeli Tuituku bilong Fiji husat em Sif Eksekutiv Opisa bilong Kiribati long makim em ol wanpela sif es-keutiv opisa," Mista Rowland tok.

Em i tok ol i lonsim tu senis long ol opisa bilong ol long wan wan ol kantri long go narapela kantri na kisim save long em tu.

Benk i mekim wok long Pasifik rijen long las 130 yia na nau i mekim wok long 12 kantri long Pasifik rijen.

Nupela teknoloji long pait agensim binatang bilong sik kakau



LUKAUTIM KAKAU: Nupela kakau neseri we ol didiman opisa na fama i sekim

PAPUA Niugini Kakau na Kokonas Institut Limited i no longtaim i go pinis, i tokaut long industri long nupela samting industri bai yusim long pait agensim binatang bilong sik kakau.

Na wantaim dispela long lukim industri i kirap gen na wok olsem wanpela bikpela industri long sapotim ol fama na ekonomi bilong kantri.

Program ol i kolim Integrated pes na disis menesmen (IPDM) i save kisim ol samting olsem:

- Prunim;
- Pamim marasin long ol kakau;
- Planim sed diwai olsem lamtor o sed tri na
- Planim kain kain kakau.

Wantaim kain ol tingting Dipatmen bilong Agrikalsa na Laipstok (DAL) i ronim IPDM.

DAL i bilip olsem wantaim IPDM em i ken strongim tingting bilong ol fama long yusim ol nupela teknologi long strongim wok kakau na wantaim strongim tingting bilong ol long groim yet haibrid o klonel kakau.

Em i bilip tu olsem wantaim dispela program ol fama i ken lukim ol kakau i kamap gut, karim na ol fama i kisim gut mani long em.

Dispela nupela teknologi em ol i lonsim wantaim PNGCCI stratejik plen 2010 i go long 2019 long Tavilo Risets stesen, Is Nu Briten long las mun.

Long taim bilong lonsing DAL Seketari Anton Benjamin i tok program i kamap bilong strongim bilip long ol fama na long lukim olsem ol fama i kisim na yusim dispela ol nupela tingting bilong helpim wok bilong ol long kakau.

Em i tok gavman i bin putim planti mani na risoses long pait agensim sik kakau tasol dispela i no mekim gutpela senis.

Long dispela as em i wok bilong ol fama long yusim dispela ol teknologi.

Em i bilong olsem IPDM i gutpela rot bilong pait agensim sik kakau na long strongim kamap bilong wok kakau.

Na long ol fama i yusim dispela teknologi em i salens bilong gavman ejensi, provinsel edministresin, famas asosiesen, praivet sekta na ol arapela bodi long lukim olsem IPDM program i kamap gut.

Long dispela em i askim ol provins we i save planim kakau long ol i mas kisim na yusim dispela program long strongim wok bilong ol na kakau industri.

Mista Benjamin i tok tenkyu na amamas long ol PNG saintis na risetsa long wokbung wantaim ol saintis bilong narapela kantri long kamap wantaim IPDM teknologi.

"Mipela i gat ol gutpela saintis na resetsa long rijen we ol i save wok aninit long planti hevi tasol i save stap strong na kamapim ol gutpela mak bilong

wok painim bilong ol.

"Mipela i mas givim luksave long dispela gutpela wok bilong ol long strongim kakau industri," Benjamin i tok.

Em i tok tenkyu tu long gavman bilong Australia long kamap wantaim dispela tingting bilong mekim risets na long putim mani long kamapim risets.

Na dispela helpim em i mekim aninit long Agrikalsa Risets na Developmen Sapot Fesiliti (ARDSF) long strongim sapot em i save mekim long wok bilong teknikal.

PNGCCI ekting CEO Dokta Eric Omuru i bilip olsem IPDM bai mekim senis long kakau industri.

Em i tok long taim sik kakau i kamap planti ol fama i lusim industri na kalap long ol narapela industri long sapotim ol tasol wantaim kamap bilong dispela program em bai pulim ol i kam bek long kakau industri.

PNG CCI i kamap long 2003 long taim PNG Kakau na Kokonas Risets Institut na PNG Kakau na Kokonas Ekstensin Ejensi i bung wantaim.

Kakau Bod na Kokonas Industri Koporesin i gat sea na olsem tupela wantaim i papa long PNGCCI.

Wok bilong PNGCCI em long mekim risets, developmen na ekstensin kamap bilong wok kakau na kokonas na salim bilong tupela long ovasis maket.

Tisa go long NARI long tok bilong klaimet senis na rais faming

Triya Papaya na Issac Taraken (NARI) i raitim

HAILANS Rijinel Senta (HRC) bilong Nesenel Agrikalsa Risets Institut (NARI) long Aiyura, Isten Hailans Provins i givim nupela toksave long ol manmeri long ol hevi i pas wantaim kamap bilong klaimet senis na ol samting long groim long dispela taim.

Long toksave bilong planim rais long kain ol wari taim opisa i mekim wokabout i go long ol tisa bilong Onerugka Hai Skul na toktok wantaim ol long rot bilong planim rais.

As bilong em i go long HRC em long hap wok em long bihainim in-sevis program we ol i makim taim bilong ol tisa long lainim ol hevi i kamap wantaim kamap bilong klaimet.

Wantaim dispela em go skulim ol manmeri long planim rais.

Em i givim toktok tasol long ol manmeri na i givim tok long tripela hap tok olsem:

- HAT bilong san na hevi em inap long PNG;
- NESENEL draught projek na
- SAVE bilong planim na lukautim rais.

Isaac Taraken husat i wanpela saintis i givim tok long Global Womring (Hat bilong San).

Long tok bilong em Mista Taraken i tok pastaim long 1980 kamap bilong ol taim bilong hat san (El Nino) i no save kamap planti. Dispela i save kamap bihain long 30 i go long 40 yia.

Tasol dispela nau i senis bihain long 1980 we klostu bihain long tripela o 5-pela yia long bikpela san i save kamap.

Em i askim ol tisa long ol i mas toksave long ol sumatin bilong ol bai ol sumatin i toksave long papamama bilong ol long wanem samting ol bai mas mekim long taim bilong ol bikpela san olsem El Nino.

Na long toktok bilong kamap bilong Nesenel Draut Projek we gavman bilong Papua Niugini i mekim em Timothy Geob i givim.

Em i tok nau yet i gat olsem 60 risos senta we kampani i kamapim long sampela hap bilong kantri.

NARI i bin givim aut ol samting olsem swit kakau, banana na tapioka long ol i planim long taim bilong bikpela san.

Na Julie Sip i tok long ol rot bilong planim na lukautim rais.

Em i tok rais i wanpela gutpela kaikai we em i ken stap long bihain taim na ol manmeri i kisim helpim long em.



KISIM SAVE: Issac Taraken (lep han) tok klia long ol hevi i pas wantaim kamap bilong El Nino long ol hap bilong PNG stat long 1980 i kam.

STRETIM SKIN: OI pilaia bilong Hekari long NSL bilong ol meri stretim han na lek bilong ol bihain long gem bilong ol agensim Biz Print Angels. Hekari win 10-1. *POTO: Andrew Molen.*

HET: Adrian Komu bilong Eastern Stars (raithan) i pasim birua bilong em bilong Tukoko Uni FC na i traim long rausim bal wantaim het bilong em long NSL gem bilong ol las wik Sarere long Mosbi. Stars i win 4-1.

AUT! Ketsa bilong Defence i sekim ampaia sapos em i autim wampela pilaia bilong PNG Power long gem bilong ol las wik Sande long Mosbi. PNG Power i win 1-0. *POTO: Andrew Molen.*

KALAP: Gol Suta (GS) bilong Young and Williams i abrusim birua bilong em bilong STC Shipping long kisim bal long Praivet Kampani netbol salens bilong ol long Mosbi las wik Sande. *POTO: Andrew Molen.*

PAS: Tupela fowet bilong Crushers i laik memeim wampela pilaia bilong Royals long CCIC pilai long Sande las wik Sande. Crushers i win 21-0. *POTO: Bustin Anzu.*

TOKSAVE: Salim ol spots dro bilong yu kam long Feks; 325 2579, e-mel;amolen@wantok.com.pg o kam lusim long Wantok Niuspepa opis long Central Waigani, NCD.

EM I KAM: Pitsa bilong PNG Power, Daniel Tovia i tro-moi wampela strongpela bal bilong em i go long pilaia bilong Defence long paitim long sofbol gem bilong ol long Bisini las wik Sande long Mosbi. PNG Power i win 1-0. *POTO: Andrew Molen.*



PAITIM: Bipo kepten bilong India, Sachin Tendulkar, i mekim rekot olsem Lara.



GEM: Pilai graun bilong kriket i bikpela tru na ol pilaia i save sanap inapim long was long bal narapela tim i paitim.

REKOT PILAIA: Brian Lara em wangepa biknem kriket pilaia bilong Wes Indis husat i brukim rekot long putim moa long 350 rans long wangepa tes.



PNG PILAIA: John Ovia em bipo PNG kepten na tu biknem kriket pilaia bilong PNG.

Pilai olsem trupela man

Save long gem

NARPELA gem we ol i save yusim hap diwai tu long paitim bal em kriket (Cricket).

Tasol stail bilong pilai dispela gem em i no wankain tumas olsem sofbol na besbol we yumi lukluk long ol las wik.

Namba wan samting we i no wankain em sais na lukluk bilong diwai o bet (bat) bilong paitim bal.

Namba tu samting em bal na narapela em pilai graun.

I gat planti arapela samting tu i no wankain, olsem ol rot bilong kisim poin, autim ol pilaia, namba bilong ol pilaia long wanwan tim na tu ol bilas o samting bilong werim taim yu pilai.

Histri bilong kriket

Kriket i stat long Inglen (England) long 1600's long taim bilong ol King na Kwin (Queen) na ol arapela bikpela manmeri olsem ol.

Dispela kain ol lain i save amamas long pilaim dispela gem ol yet bipo long em i go bikpela na i go aut long ol arapela ples long Inglen na Yunaited Kingdom (UK) we planti moa manmeri luksave long en na i pilaim.

As tingting bilong dispela gem em long pilai wantaim amamas na i noken kamapim kros pait namel long tupela tim. Long dispela as ol i save tok olsem em i gem bilong ol trupela man o ol jentel men (gentlemen).

200 yia bin long dispela gem i kamap long Inglen, em i go long Australia.

Tripela yia bihain long em i kamap long Australia, ol i kamapim wangepa kompetisen na i save pilai olgeta taim long Sidni.

Australia i kamap namba wan tim bilong ol long go raun na pilai long Inglen long 1877 na birua bilong tupela long kriket i kamap long dispela gem i nap nau.

Wangepa samting tu long tingim em, ol pilaia bilong Australia long dispela namba wan tim tru em ol Aborijin (Aborigines) pilaia tasol.

Sampela ol biknem pilaia long wol husat i apim nem bilong dispela gem em;



Adam Gilchrist, Brian Lara, Darren Gough, Sachin Tendulkar, Sahid Afridi, Shoaib Akhtar na planti arapela.

Kriket long PNG

Kriket long kam long PNG taim ol wait man na ol wokman bilong sios i kam bipo tru long skulim ol manmeri long tok bilong God.

Ol i save pilai dispela gem wantaim ol asples manmeri na dispela em i wangepa rot we ol asples i lainim long pilai kriket.

Dispela spot i no kamap strong long planti provins insait long kantri tasol long NCD na Sentrol em i strong tru bilong wanem ol i save pilai dispela bipo yet long taim bilong ol misinari inap long nau.

Em i save kamap tu long Lae na liklik long Madang.

Ol asples bilong Milen Bro provins i save pilai kriket long narapela kain rot we i no wankain olsem kriket bilong tete.

Gem bilong ol i save yusim narapela kain bet na stail bilong pilai tu em i krangi liklik tasol ol i save i kolim olsem kriket tu.

Cricket PNG (CPNG), husat i save ronim kriket long Papua Niugini gat tingting long surukim gem i go aut long ol arapela provins na Milen Be em i wangepa provins we ol i gat tingting long go pas long en.

Ol i laik kamapim sampela wok developmen long Wes Nu Briten provins tu bilong wanem i gat ripot olsem i gat kriket pilai graun i stap long we i soim olsem ol i save pilai kriket long hap bipo.

CPNG nau i kamapim na strongim ol junia developmen program bilong ol we i lukim ol i kamapim kompetisen bilong ol skul tu.

Ol wok i kamap nau long stretim ol pilai graun na tu givim moa trening na intanesenel gem bilong ol PNG pilaia, kosa na ampaia bai ol i ken apim level bilong gem long PNG.

Sampela ol biknem PNG kriket pilaia

em John Ovia, Rarua Dikana, Mahuru Dai na Chris Amini.

Long PNG, kriket em i wangepa spot we i winim planti moa intanesenel gem na tonamen, long ol arapela spot olsem ragbi lig, yunion na soka we PNG i save strong long en tu.

PNG i no stap yet long namba wan level wantaim ol arapela kriket kantri olsem Australia na Nu Silan tasol long level tri divisen bilong en, em i wangepa strongpela kantri long dispela spot.

Em i wok long traim long go antap long level tu nau.

Stail bilong pilai kriket

Tupela tim i save pilai kriket insait long wangepa gem.

Wanwan tim i save gat 11-pela pilaia na wangepa tim bai salim tupela pilaia bilong ol i go aut long paitim bal na narapela tim bai tromoi bal long ol i paitim na tu was long ol bal tupela i paitim.

Tupela pilaia husat bai paitim bal o ol batsmen (batsman) bai sanap namel long pilai graun ol i kolim kris (crease).

Pilaia bilong narapela tim bai ron i kam na tromoi bal i go long wangepa pilaia long paitim.

Sapos em i paitim bal na narapela tim i no pasim dispela bal, em bai ron i go daun long hap sait bilong kris na wanpilai bilong em bai ron i kam long ples bilong em.

Dispela ron bilong tupela bai kisim poin bilong tim bilong ol, wangepa ron em wangepa poin.

Ol i save kolim dispela ol poin olsem rans (runs).

Tupela bai ron olsem inap narapela tim i kisim bal.

Tripela liklik hap diwai o stik i save sanap i go insait long graun long baksait long ples bilong sanap na paitim bal.

Dispela tripela hap stik em wicket (wicket), sapos batsmen i no pasim gut bal we ol i tromoi long em na dispela bal i go na paitim wicket, em dispela batsmen i aut na narapela bai kam kisim ples bilong em long paitim bal.

Batsmen i ken aut tu sapos em i paitim bal i go antap na ol narapela tim pilaia i

KRIKET

kisim dispela bal bipo long bal i pundaun long graun.

Em i ken aut tu sapos em i ron yet na ol i kisim bal na paitim wicket we em i wok long ron i go long en.

Long pilai, man bilong tromoi bal o bola, bai ron i kam long baksait bilong narapela wicket na tromoi bal i go long hapsait wicket bilong batsmen long paitim.

Bola bai tromoi bal i go daun long graun klostu long batsmen na em bai paitim o pasim dispela bal taim bal i pas long graun na kalap i kam antap long em.

Bilas na yunifom bilong kriket

Olsem planti ol arapela spot, kriket tu i gat ol samting we yu mas i gat sapos yu laik pilai.

Sampela bilong ol dispela samting em bilong lukautim bodi bilong yu bai yu noken kisim bagarap na sampela em ol samting bilong pilai olsem bet na bal.

Ol kriket pilaia mas i gat karamap bilong lek na han na strongpela kep bilong passim het bilong ol tu taim ol i laik go bet o paitim bal.

Ol i mas i gat su we i gat nil bai ol i noken wel taim ol i kalap long tromoi bal, bet o was long fil.

Pilaia husat i save was baksait long wicket mas i gat han glav bilong holim bal na tu karamap bilong lek.

Kriket bal em i strong tru olsem na dispela ol karamap bai lukautim bodi bilong yu long bal i noken paitaim na bagarapim yu.

Planti ol tim i save gat dispela ol samting bilong pilai pinis tasol i gutpela long wanwan pilaia i gat bilong em yet.

Kriket em i gem we i no hat long pilai na long planti ples bai yu lukim ol manmeri sanapim hap palang, bokis, tripela liklik stik olsem wicket, pasim liklik bal wantaim stiki tep (sticky tape) o plastic, painim hap diwai olsem bet na pilai gem bilong ol yet.

Yu tu i ken pilai tasol noken tromoi bal strong tumas bilong wanem nogut yu paitim poroman bilong yu long en na em bai pilim pen o kisim bagarap.

Hatwok bilong Australia ino pinis



GUTPELA WIN: Australia i mas wokhat moa long redi long wol kap.

AUSTRALIA i winim Inglen long Commonwealth Bank Intanesenel Wan De kriket salens bilong ol tasol Cameron White i tok hatwok bilong ol ino pinis yet.

Ol i winim 6-pela gem agensim Inglens husat ol i winim wanpela tasol.

Australia i win wantaim 57 rans las wan Sande long WACA long Perth, long laspela gem bilong ol long dispela resis.

Dispela gutpela win bilong Australia i kamap bihain long ol i lus long Inglen long Ashes tes.

Olgeta kantri wok long redi nau long go long wol kap long India na Australia pilaia, Cameron White i tok Australia i no painim gut gem bilong ol yet.

“Mi ting mipela i mas stretim gut bet na bal bilong mipela,” em i tok.

“Mipela i pilai gut nau tasol mi ting mipela i ken apim dispela gem i go long narapela level yet, we i mas kamap long kain tonamen olsem wol kap,” White i tok.



Yasause sanap long kot long dai bilong foma Kumul

BIPO bosman bilong Opis bilong Klaimet Senis na Kabon Tred (Office of Climate Change and Carbon Trade – OCCCT), Dokta Theo Yasause i bin kamap long kot long Tunde dispela wik long toktok long ol ripot olsem em i sutim i dai bipo Kumul kepten, Aquila Emil.

Dispela hevi bin kamap long las wik Fraide nait long Mosbi na polis i salim tok long Dokta Yasause husat ol i bilip i stap insait long dispela hevi, long kamap long polis stesen long Mande.

Dokta Yasause i kamap na ol i toktok long em long Mande na

em i kamap liklik taim long kot long Tunde.

Emil i dai long las wik Fraide nait taim em i draivim kar i kam aut long Lamana Gold klap long Waigani na i bin laik i go lusim tambu meri bilong em long haus bihain long wanpela bung.

Ol ripot i tok kar bilong Emil i bam wantaim narapela kar, we ol i bilip i bilong Dokta Yasause.

Sampela kros i kamap liklik namel long ol bipo long Dokta Yasause i rausim gan na sutim Emil klostu tru.

Dai bilong Emil i kirapim planti belhevi namel long ol ragbi lig pilaia na sapota insait long kantri

na tu long ovasis.

Emil i bin wanpela nambawan hap bek bilong PNG Kumuls long bipo na i wanpela bilong ol asples PNG pilaia husat i bin go pilai insait long NRL bipo long ol arapela.

Em i bin go pas long nesene tim tu olsem kepten na i pilai wantaim ol arapela biknem olsem Stanley Gene, Stanley Haru, Philip Boge, David Buko, Arnold Krewanty, John Wagambie na Adrian Lam.

Emil i wok olsem junia developmen opisa bilong ragbi lig long PNG na tu NRL Bid i go inap long dai bilong em.

Ashley-Cooper bai stap tupela moa yia olsem Wallaby

ADAM Ashley-Cooper bai stap yet olsem wanpela pilaia bilong Australia Wallaby bihain long em i sainim wanpela nupela kontrak wantaim Australian Rugby Union (ARU) las wik.

Em i namba tu man long mekim dispela bihainim huka, Stephen Moore.

Ashley-Cooper, 26 krismas, i bin pilai bilong Australia namba wan taim tru long Perth long 2005.

Nau em bai pilai tupela moa yia bilong kantri bilong em we bai lukim em i pinis long 2013.

Em i tok Australia i wok long kamap gut aninit long kosa, Robbie Deans na i luk olsem planti moa gutpela samting bai kamap long ol na dispela em i wanpela as em i sainim kontrak long pilai gen.

“Mi pilim olsem mi gat planti moa samting long givim long dispela jesi bilong Australia,” Ashley-Cooper i tok.

Insait long 43 tes bilong Australia namel long 2008 na 2010, em i no pilai long 4-pela tasol.

Dispela stail beklain pilaia i putim tu 16 trai insait long 51 tes bilong em.

“Mi lukluk tasol long pilai long wol kap dispela yia na tua i go long Inglen long 2013,” em i tok.

Mis PNG mekim aweanes na lukluk long ples

i kam long pes 28

Long wankain taim ol i raun, James i go insait long ples na i mekim ol aweanes long sik kolera na tu i givim sampela ol samting bilong Red Cross i go long ol.

Ol narapela husat i go wantaim James long dispela raun em Stephen Damien na Annette bilong Up South

Events, Kenol Mark Sheppard bilong ami bilong Australia, Sarah MacCana bilong AusAID na namba tu sekreteri bilong Demokretik Gavenens.

Cathy Amos bilong Demokretik Gavenens bilong AusAID tu i bin go na i ron long kar wantaim ol kago bilong ol na i was long ol long rot.

Ol i ron inap 120km long haiwe na bihain i go stap wantaim Amos long

ples bilong em long Navalus.

James i tok, i gat planti gutpela samting long rot we ol manmeri ken lukim sapos dispela resis i kamap na ol i ron insait long en.

I gat bilip olsem dispela grup i tingting long kamapim dispela resis long bonde bilong Kwin dispela yia sapos olgeta samting i kamap gut na i redi.

Ol nupela pilaia amamasim Knights kosa

KOSA bilong Newcastle Knights, Rick Stone, i amamas long planti ol yangpela pilaia husat ol i kisim i kam insait long sinia tim dispela yia.

Ol i helpim long dro 22-22 wantaim Warriors long wanpela trail gem bilong ol long Nu Silan las wik.

"Yes, mi ting Joel Edwards i pilai gut bilong mipela, em i pilai 4-pela NRL gems pinis na i luk olsem em i nap long pilai planti moa gem bilong mipela," Stone i tok.

"Mi ting Pete Mata'utai na yangpela bek ro fowet,

Zane Tetevano tu i soim strongpela gem," em i tok.

Dispela gem we i kamap long Greymouth long makim de na tingim bek 29 wokman husat i dai long gol main long Pike wara las Novemba, i lukim tu kam bek bilong Chris Houston long klap.

Houston i no bin pilai bilong Knights long 2010 sisen bihain long ol polis i mekim wok painim aut long ol ripot olsem em i save kisim na salim drak.

Em i stretim rekot bilong em bihain long olgeta wok painim aut i pinis na ol

Knights i kisim em i go bek long of-sisen.

Na Houston i no westim taim long putim mak bilong em gen taim em i putim wanpela trai long helpim ol i dro wantaim Warriors.

Warriors i bin go pas long gem na i luk olsem ol bai win tasol strongpela Knights i lukim ol i salim yangpela winga, Simon Williams i go skoa long kona long fultaim stret.

Mata'utia i bin gat sans long givim win long tim bilong em tasol kik bilong em i abrus na ol i pinis wantaim dro.



KAM BEK: Houston i putim wanpela trai long namba wan gem bilong em wantaim Knights gen.



Bagarap stopim Tuiaki

WINGA bilong West's Tigers, Taniela Tuiaki, bai no inap pilai ragbi lig gen bihain long wanpela bagarap long lek bilong em i no orait hariap.

Tuiaki kisim dispela bagarap long skru bilong fut bilong em long raun 24 NRL gem bilong ol agensim Parramata long 2009.

Dispela bagarap i lukim em i no pilai long 2010 sisen na i wok long lukluk long kam bek dispela yia tasol lek bilong em i no orait yet.

Tuiaki kisim tripela operesen long stretim lek bilong em tasol wankain hevi stap yet na dispela i mekim em i rausim nem long pilai ragbi lig.

Em i gat 28 krismas tasol na i pilai 78 gem bilong Tigers na 4-pela tes bilong Nu Silan.

Tuiaki husat hevi bilong bodi bilong em i 110kg, i kisim luksave na planti sapot long ol sapota long ol strongpela ron bilong em we i lukim em i save brukim ol takol na rausim ol narapela pilaia husat i laik holim em.

Long 2009 yet bipo long em i kisim bagarap, Tuiaki mekim rekot bilong klap bilong em long putim 21 trai insait long wanpela yia.

Dispela i lukim em i winim Dally



PINIS: Tuiaki no amamas long pinis pilai long kain rot.

M awod olsem namba wan winga bilong NRL long dispela yia tu.

"Mi wari tru olsem mi bai pinisim gem bilong mi long kain rot olsem.

"Mi gat bikpela sori tru," Tuiaki tok long ol nius ripot.

"Taim mi kisim bagarap long namba wan taim tru, mi save olsem em i nogut tasol mi bilip yet olsem mi bai kam bek yet long pilai bilong West's Tigers," em i tok.

"Mi traime yet tasol olgeta toktok bilong ol dokta i soim olsem em bai no inap kamap," Tuiaki tok.



Raiders bilip long Furner

DAVID Furner bai stap yet olsem kosa bilong Canberra Raiders bihain long klap long sainim nupela kontrak wantaim em dispela mun.

Dispela nupela kontrak bai lukim Furner i stap wantaim ol Raiders inap long 2014.

Jenerel Menesa bilong Raiders Group, Simon Hawkins, i tok bod bilong ol i laik holim Furner i stap wantaim ol longpela taim.

Em i tok Furner i gat tupela moa yia i stap long olupela kontrak bilong em tasol ol i laik em i stap long taim olsem kosa bilong ol olsem na ol i sainim nupela kontrak gen wantaim em.

Furner i bin kam long Raiders long 2009 na long dispela taim i nap nau i bin strongim tim gut we i lukim ol i givim planti gutpela salens long NRL long las tupela yia em i stap wantaim ol.

Em i tok em i amamas long



STAP YET: Furner bai lukautim Raiders i nap 2014.

bod i gat bilip long em na em bai wokhat bilong klap.

"Em i gutpela long mipela i stretim dispel hevi na nau mipela i mas wokhat long kisim klap i go antap long mak we mipela i save mipela i nap long kamap long

en," Furner i tok long ol nius ripot.

"Mi amamas long lukim klap i soim bilip bilong ol long mi na mi save tu olsem mipela i gat planti wok i stap long kamap strong na win olsem wanpela tim," Furner i tok.

Winim NRL Jesi olgeta wik wantaim TURBO

Baim TURBO na go insiat long Dro

***1290*1*Turbo amount#**

TURBO K5,K10,K20 & K40 available

Ringim Customer Care on 1551 long moa toksave

bemobile mipela bilong yu

Kompatisen bai pinis long 05th March 2011

Terms & Condition Apply
Jerseys Subject to availability

PM sapatim golp bilong helpim Kwinslen

PAPUA Niugini Praim Minista, Gren Sif Se Michael Somare, bai putim K50, 000 long sapatim dispela Golp resis we i kamap las wik long bungim mani bilong helpim ol manmeri bilong Australia.

Dispela golp resis i mekim pinis moa long K100, 000 long tupela de ol i ronim tonamen las

wik Fraide na Sarere.

40 tim i givim nem long stap insait long dispela gem na ol arapela i helpim tu long ol prais na mani bilong ol tim na pilaia husat i win.

Ol ogenaisa i salim sampela samting ol i kisim long ol done-sen long mekim moa mani long en.

Se Michael na namba tu bilong em, Sam Abal i bin stap insait long dispela pilai we i lukim Praim Minista i putim tripela tim.

Em i tok long wanpela stetmen pepa olsem Australia em i namba wan kantri long kamap na helpim PNG long taim bilong hevi.

"Long dispela as mi amamas

long lukim dispela gem i kamap bai olgeta memba bilong komyuniti ken i kam bung na givim han long helpim ol gutpela poroman bilong yumi long Australia," Se Michael i tok.

Em i tok amamas long Pot Mosbi na Boroko Rotary klap long kamapim dispela pilai na tu long ol arapela bisnis husat i

kamap long helpim.

Kana Contraction i winim namba wan ples long dispela resis na namba tu i go long QBE.

Bikpela tait wara i bin bagarapim Kwinslen long namel bilong mun Jenuari dispela yia na nau ol wok i kamap long helpim ol manmeri na stretim ples bilong ol gen

Crushers mekim gen

Bustin Anzu i raitim

OL KING bilong Coca Cola Ipatas Kap (CCIC), Tom Kune Kamkumung Crushers bilong Lae, i mekim gen long go insait long dispela bikpela op-sisen pilai resis long las wiken.

Ol mangi long Kamkumung i save olsem dispela resis long kisim bikpela prais mani na tu, banisim dispela taitol bilong ol en ino isi na long statim dispela, ol i kisim tiket gen long go insait.

Ol narapela tripela tim husat bai makim Momase insait long dispela K100, 000 prais mani resis tu em Lae Bisket Morobe Tambuaks, Aiyura na Samojoli Bobo Warriors bilong Kimbe.

Aiyura na Warriors em tupela nupela pes insait long CCIC, Warriors bai makim Niugini Ailans.

Crushers i bin winim olgeta pilai long Pul A bilong ol long go insait.

Long Fraide, ol i winim Tim West bilong Lae, 16-6, dro wantaim tren-on tim bilong SBS Mendi Muruks, ol i kolim Butterflies, nogat skoa long Sarere na rausim namba wan birua bilong ol long dispela resis, PNG Toner and Ink Supplies Royal 21-0 long Sande.

Ol nupela pes, Warriors i mekim wankain tu, ol i winim tripela tim bilong ol long Pul C.

Ol i daunim Unitech Spartans 30-20, rausim Bismarck Sifase 16-1 na Busuino Raiders 24-3 long kisim tiket.

Tambuaks (Pul B) na Aiyura (Pul D) i wokim wankain samting long i go long namba tu hap bilong dispela pilai resis we bai kamap bihain long wanpela mun long Lae.

Ol bai wetim ol pilai long Isten Hailens, Simbu, Jiwaka, Westen Hailens, Sauten Hailans na Enga long pinis pastaim.

Bihain long dispela ol pilai, ol bai painim ol wina long ol dispela ples.

Momase, Isten Hailans na Simbu bai pilaim ol gem bilong ol



TAKOLIM EM: Ol Royals i laik daunim wanpela Crushers pilaia long Pul A gem bilong ol long Lae las wik Sande. POTO: Bustin Anzu.

long Lae, we 10-pela tim bai soim pes.

Narapela 10-pela tim bai kamap namel long Jiwaka, Westen Hailens, Sauten Hailans na Wabag.

Ol bai bung long Wabag. Long dispela tupela pilai long Lae na Wabag, ol bai kamapim 4-pela tim tasol, tupela long Lae na tupela long Wabag.

Ol dispela tim bai bung long Wabag long luksave olsem husat tru bai apim 2011 CCIC trofi na tu putim K100, 000 prais mani long poket bilong ol.

Ol tim husat i pilai insait long dispela pilai long Lae, i kisim sampela luksave long mama sponza, Coca-Cola.

Ol dispela tim husat i kisim K300 em Tim West, Lae Royals,

SBSL PNG Butterflies, Lae Ever Clean Nawaeb Bulldogs, Noikopa Owls, Buimo Road Snipers, Buisono Raiders, Bismarck Sisafe, Unitech Spartans, Banguji Royals (Madang), Kimbe STK Bullets na Tumerizah Nakes.

Long Fraide nait, ol i lonsim dispela kap, we 65 tim insait long kantri bai pilai.

Memba bilong Wewak ilektoret, Moses Manuwa, husat i makim petron bilong CCIC na Gavana bilong Enga, Peter Ipatas, i rausim laplap i karamapim dispela Kap long soim olsem pilai ken go het nau.

Em i tok Ipatas i gat bikpela tingting long ol yangpela bilong bihain taim na dispel i mas stap wantaim ol grasrut manmeri na dispela pilai stap long level bilong ol.

"Gavana em wanpela stail gavana we em i tingting long bihain taim bilong ol mangi, olsem na em i kamapim dispela pilai, nau we i wok long kamap.

"Em han mak bilong gavana," Manuwa i tok.

Nesanel Sels Menesa bilong Coca Cola, long Papua Niugini, Matt Green i tok ol i amamas long kamap olsem wanpela sponza long dispela bikpela pilai long wanem, ol i kamapim planti ol gutpela pilaia we i nogat luksave bilong ol.

"Mipela i amamas long kamap sponza long dispela bikpela pilai.

"Dispela pilai em wanpela bikpela pilai na kamap olsem wanpela nesanel pilai bilong Papua Niugini na ol i painim aut planti mangi husat i gat save na skil tasol ol i no soim aut pastaim.

"Wantaim dispela CCIC, planti mangi kamaut na soim stret ol i husat," em i tok.

Em i tok amamas tu long ol narapela sponza husat i kam insait na helpim ol long ronim dispela bikpela pilai.

Long dispela nait, Jenerel Sekreteri bilong CCIC, Frank Rai bin tokaut tu long sampela sponza we i givim helpim tu.

Em i tok Kelly Naru Lawyers, Alfred Manase Lawyers, Lae siti Meya, na Tit Karato em sampela sponza husat i helpim bihain.

Narapela ol i helpim pastaim wantaim Coca-Cola na Gavana Ipatas em PNG FM, Digicel PNG, MRDC, Barrick Porgera, Lae Biscuits na SBSL.

Ol pilai long Isten Hailans bai stat long dispela wiken.

LAE BISCUIT CO.



WANTOK

SPOOTS

LAE BISCUIT CO.



Isu 1903

Wan wik: Fonde, Februari 10 - 16, 2011.

PNG's Nambawan Mackerel

Besta

FINEST QUALITY

PNG MADE



It's Better, It's Besta!

Wilwil resis bilong Nu Ailan

RAUN: Rachael James i gat tingting long kamapim wanpela wilwil resis long Nu Ailan.



OL POTO: RACHAEL S. JAMES.



Mis PNG mekim aweanes na lukluk long ples

Andrew Molen i raitim

I GAT sans long wanpela bikpela resis bilong ol wilwil (bicycle) i kamap long Papua Niugini sapos i gat gutpela wok i stap long lukautim na ronim.

Wanpela grup bilong ol manmeri husat i laik kamapim dispela kain resis i wok long raun na lukluk long wanem hap dispela kain resis i ken kamap.

Namel long ol em Mis PNG, Rachael Sapery James. Las wik, ol i go long Is kos bilong Nu Ailan provins na traिम ronim ol wilwil bilong ol i go antap long Bolu-minski haiwe.

Ol i traिम dispela rot long lukim sapos ol i kamapim dispela resis long hap we ol i laik kolim "Tour de Malagan" (Tua di Malagan).

Moa long Pes 25.

Em i BIKPELA TCM

seleksen bilong FORKLIFTS na PARTS



BOROKO MOTORS

PORT MORESBY PH: 325 5255 | LAE PH: 472 1144 | MT HAGEN PH: 542 1933 | TABUBIL PH: 649 9048
KIMBE PH: 983 5035 | MADANG PH: 422 2659 | RABAU PH: 982 8193 | GOROKA PH: 532 3552

Email: info@borokomotors.com.pg
Website: www.boroko-motors.com

